



**Хурмат бусса Ххутрал жямат!** Август зурул 3-4-нний дуллалиссар Ххутрал жяматрал кьини. Жула авадансса Хтарих бусса, ххаллилсса шярваллил ца-кьини бюхттул дан, ляхъу кІану лавай бан, бухъхьяра буттал шяравун байрандалийн. Авадансса дуссар ва кьинисса программа. Ялугълай буру цинявннах ппухълуннал миналий.



# ШЯР

№29  
(2247)

2 АВГУСТ 2024 ш.

РЕСПУБЛИКАЛУЛ ЖЯМАТИЙССА ВА СИЯСИЙССА ККАЗИТ

Кказит буклай бивкІессар 1917 ш.  
Цунил итабакълан бивкІессар 1991ш.

## ПаччахІлугърал наградартту дуллунни хъхъичІунну зузиминнан

Июльданул 26-нний, Дагъусттан Республикалул Конституция-лул Кьини, Регионалул бакІчи Сергей Меликовлул дуллунни паччахІлугърал наградартту. Вай дуллуннавух бур чІявусса оьрчІ-бакІ бусса нину-ппу, духтуртал, учительтал, промышленник-тал, аьралитал, культуралул зузалт ва цаймигу.



«ДР-лул лайкь хъусса журналист» ца дуллунни НТВ-лул корреспондент Оьмар МахІаммадовлун

БавтІми барча буну махъ Сергей Меликовлул куна: – 30 шинал хъхъичІ Гъанумур закондалул баян бувссар яла лавайми даражалул ххазинарттуну хъанай бушиву дагъусттанлулвтурал ихтиярду ва тархъаншиву, ккаккан дурссар жула республикалул ттизаманнул дицкуц, Аьрасатнал Федерациялул пасса ихтиярдашалсса субъект хІисаврай. Жунна дакІнийссар та чІумал регионалий диркІсса захІматсса чІун, вара тагъар дия шала билаятрайгу. Амма хъамабитан къаьркинссар цамургу: 30 шинал хъхъичІ Конституциялуха зий бивкІминнал жула ялун нанисса никирттахъ дирхъуну диркІшиву пашиврул ва лагма лагаврил агъамсса дарс.

ХІакьинусса кьинигу яла агъаммур правалул документ дагъусттанлулвтураха къллугърай бур, циняв архІалшиврул ва

тІайлашиврул, дакъаврил ва рязишиврул, патриотшиврул принципру исват буллай.

ХІакьинугу билаятрал тарихраву дахханашивуртту хъанакьисса чІун дуркІун дур. Кьини дурксса чІумал хІасул шайссар дагъусттанлулвтурал язими хасиятру: чувшиву ва аьзизсса улклуйн дакІ тІайлашиву, бурж бартбигъаврийн хиянат къашаву, кумагран бучІан хІадурну бушиву.

Хасъсса дяввилул операция нанисса ишираву Дагъусттаннал аьралитурал лайкьну бартбигълай бур цалва хъхъичІсса масъалартту, национал мурадру бурчлай. Жула11 ватанлул лайкь хъуну ур «Аьрасатнал Виричу» тІисса бюхттулсса цІанин, 100-хъл лайкь хъунни «Чувшиврул ордендалун» ва цаймигу наградарттан. Цуксса хІайпнугу, ца-

➔ Ахир. 2 лаж.

Каспийск шагърулий лахъа-хъунсса даражалий дунни Аьралий- хъхъирил Флотрал байран. Каспийскалий ххюйлчинни ва байран дуллалисса.

## Каспийск шагърулий лахъа-хъунну кІицІ ларгунни Аьралий-хъхъирил Флотрал кьини



Парадрай гьуртту хъуна, цаннир ца эмаратсса, Каспийскал-лал флотилиялул жамирду. Ва кьини Каспий хъхъирий пара-драй бия ракетардал, артилле-риялул ва дазурдал жамирду. Вайннувах бия «Дагъусттан», «Углич» тІисса ракетардал жа-мирду, «Волгодонск» тІисса ар-тиллериялул жами, «МахІаммад ХІажиев» тІисса базовый трак-тильщик, «Николай Ивашин-цов» тІисса гидрографиялул жами, «Расул ХІамзатов» тІисса жами, РВК-933 рейдру дайсса жами.

➔ Ахир. 3 лаж.

## Лаккуй – чывхъа-гъараллу

Ларгсса ножмардул ахирданий, июльданул 26-нний, зунтта-микІирал тамансса зараллу биян бунни инфраструктуралун, инсан-турал къатран, шярваллил хозяйствалун. Щунни вайннул шатІив Лакрал районалийнугу.



Урувгнал дакІ зия хъунсса кьия хъуну дия Инишиял ва Ви-раттиял СПК-рттал гъаттарай. ЛивтІусса ризкьилул (оьллу, ницру, чу) ккал 100-ннийн лархъсса дур: Инишиял – 54, Вира-ттиял – 40-нния лив-чусса.

Мурчал мурхъру гъагъан буну, гъавгъсса мурхъирдал элект-ричествалул тталлу бивчуну, ххаллу дуцан дурну, цимирагу ссятрай инсантал чани бакъа ливчІун бия Гъумук ва лагма-шархъай.

➔ Ахир. 3 лаж.

## Дагъусттаннал Конституциялул кьинилун хасну

### Филармониялул Гъинтнил майданни

Махачкъалалив Дагъусттаннал паччахьлугърал филармониялул Гъинтнилмур майданни хъунни Республикалул Конституциялул кьинилун хас дурсса шадлугъ. Ванил дайди ху дурна Дагъусттаннал опералул ва балетрал театрдулул хорданул ва симфониялул оркестранул, республикалул гимн шаллу даврийну.



Ва хъхуну залданувун бавтми республикалул халкъуннал ихтияду, паракъатшиву дуручлачисса закондалун хас дурсса кьинилушал региондалул бакчи Сергей Меликовлул, Халкъуннал Мажлисрал ва Хикуматрал чулуха барча буллалисса, ва байрандалул тарихрая бусласисса ихтилат бунна ДР-лул Хикуматрал председатель Абдулмуслим Абдулмуслимовлул.

– Хакъину жулла чяву миллатру бусса республикалул кици лаглай дур жулва тарихраву хъуннасса агъамшиву дусса иширал 30 шин. Жулва билаятран бигъа дакъасса чумал къамул дурсса закондалул кабаку буллалиссар чяву миллатру бусса Дагъусттаннай дакъаву, паракъат-

шиву, цашиву дуручаврицун, республикалул политикалул ва экономикалул саргъуншиву ядаврицун, – увкуна премьер-министрал.

Гихуннай ванал чурчав дуруна ванияр 25 шинал хъхичи республикалул тарихраву хъусса бала-апатисса аьралий иширттай, вайннуву жулва халкъуннал ккаккан дурсса виричувшиври, цашиврий.

«Живая классика» конкурсал финалист Тамерлан Хизриевлул дюххану дурккуна Роберт Рождественскийл «Что же такое «мы»?» тисса назму.

Хъирив республикалул творчестволул коллективиртал ва таксса гуртгучитурал ккаккан дурна хъуннасса концерт.

## Ссихьрал театрдану

Республикалул Конституциялул кьинилун хасъсса шадлугъ хъунни Дагъусттаннал паччахьлугърал ссихьрал театрдулул хъхичигу.



Театрдулул творчестволул коллективрал ва кьинилийн хадур дурну дия оьрчансса ва вайннал нитти-буттансса «Дагъусттан – ттул Ватан» тисса музыкалул ва театрал постановкардал программа. Ва кьини майданни бивккуна мюрши оьрчан чьяни-ва ххир хъусса личи-личисса

персонажру, вайннашал архал оьрчру ва нину-ппу бивзуна къавтун, увкуна балайрду, гуртту хуна конкурсирдавух ва турктуравух. Театрдулул артисттурал дурккуна ватандалухасса назмурду.

**Бадрожамал АБЛИЕВА**



## Паччахьлугърал наградартту дуллунни хъхичунну зузиминнан

→ Дайди ху 1 лаж.

ппарассаннал наградартту дуллунни Ватандалул цаний жанну кьурван дурну махъ. Вай оьрмулува лавгссар вирттал кунма, хлучи къакуну, махъунмай къавхуну. Вайннал царду даиман личантиссар Аьрасатнал дяввий бюхтулсса цардан лайк хъуминнал сияхравух, – куна Сергей Меликовлул.

Республикалул бакчинал цалчинмур награда дуллауна Каспий-скалиясса, 10 оьрчи-бак тарбия буллалисса нигтин, Написат Камилван.

– Ина вила эбратрайну чалачи буллай бура кулпатиртал ххазинарду, оьрчан лахъхьин буллай бура захмат ххирашиву ва хъуниминнал хурмат буллан аьркиншиву. Барча тий ура вих «Мать - героиня» ца дулаву, ва ина лайк дурсса наградар. Ча тий ура вил кулпатран цулушиву ва узданшиву, – куна бакчинал.

Сергей Меликовлул барчаллагъ куна учительтурахъ, педагогтурахъ, наставниктурахъ.

«Дагъусттаннал лайк хъусса учитель» тисса удостоверение Сергей Меликовлул дуллауна Уркараулул многопрофиль гимназиялул учитель Раисат Абдуллаеван ва Новопоселокрал школалул учитель Нисейхалум Амаханован.

Шиккура кици дурна медициналул зулалтрал хъхичунсса давурттугу. Республикалул каялувчинал канива наградартту ларсуна медициналул зулалтрал – Гюлнара Яралиевал, Асият Хасановал, Абусупиян Махаммадовлул, Патимат Гихаловал ва цаймингалу.

Дагъусттаннал полицейский Набир Оьмаровлул Сергей Меликовлул дуллауна Чувшиврул орден.

– Набир Оьмаровлул июндадулул 23-ний террорчитурал хъхичилу кьуркьуссар, цайна захматсса шаву дирну дунугу. Чувшиврухлу, къучагъшиврухлу ва цала къуллугърайн даки тайлашиврухлу Аьрасатнал Федерациялул президентнал Набирдун дулуссар Чувшиврул орден, куна Республикалул бакчинал.

Наградартту дуллауна, дагъусттанлувтуран дакъасса, цайминнангу.

Сергей Меликовлул оьвкуну, республикалийн увкуна майор Денис Диденко. Ванал билаятрал президентнашлсса хуна-бакъаврий бивсун бивкиссар Дагъусттаннал аьраличу Махаммад



Исабековлул гьунардануя ва паччахьлугърал бакчинахъ тавакью буну бия ванан Аьрасатнал Виричунал ца дулул. Сергей Меликовлул майорнал дуллауна ДР-лул Бакчинал ца чирчусса ссят. Мукунасса ссятру дуллауна связист Валентин Петровлул ва пулеметчик Владимир Семеновлул. Вайннал цайна нигъачаву дусса тагъарданува ххассал увну ивкиссар захматсса шаву дирса дагъусттанлув Хажимурад Казанбиев.

Наградарттан лайк хуна республикалул журналистгалу.

«ДР-лул лайк хъусса журна-

лист» ца дуллауна «Известия» МИЦ-рал корреспондент Мурад Махаммадовлул, НТВ-лул корреспондент Оьмар Махаммадовлул, Махачкъалаливсса ВГТРК-лул корпунктрал хунама Саркар Махаммадовлул.

Республикалул каялувчинал наградартту дулаврил церемония кьуртал дурна Владимир Путинлул мукьурттийну: «Дакъассар агъалинал дулул шайсса награда, амма гьаман вайннал виричувшиву Ватандалул ва ванил мурадирттал лагма лагаву – жула ххувшавурттал гьанур».

**Хладур бивссар  
ХИ.АБДИЛОВЛУЛ**

# Каспийск шагърулий лахъа-хъунну кӀицӀ ларгунни Аьралий- хъхъирил Флотрал кьини

→ Дайдихъу 1 лаж.

«Альбатрос» тӀисса катер-даний моряктал пишалул байрандалушал барча бувна контр-адмирал Олег Зверевул ва Дагъустаннал бакӀчи Сергей Меликовул. Байрандали гьуртту хъуна ДР-лул Хикуматрал председател Аьбдулмуслим Аьбдулмуслимов, Каспийск шагърулул мэр Борис Гонцов, флотилиялул ветерантал ва идарарттал вакилтал.

Байрандалун хасъсса шад-лугъру дайдирихъуна «Приветствие Петра I» тӀисса театр-данул зумунусса мероприятия-лийну ва аьралий спортрал ТуркӀурдайну.

Парад нанисса ппурттуву тӀайланнасса эфирданий ккаккан увна аьралитал барча бул-лалисса Аьрасатнал президент Владимир Путин.

Президентнал ихтилатраву кӀицӀ лавгуна, ва байран мудан-гу лахъа-хъунну дуллаи бушиву, пахрулий ва хӀурмат-кыматрай бушиву цӀанихъсса тарих бусса Аьралий-хъхъирил Флот.

Каспийскаллал флотилиялул аьралитурал хъхъирий ва зуманицӀ ккаккан дурна фло-тилиялул аьралий инсцениров-картту.

Мероприятилий гьуртту хъуна 600-нийн бивсса аьрали-тал, 50-хъул жамирду, катерду ва 10 хасъсса аьралий техника.

Байрандалул лагурий хъуна хъхъичӀун ливчусса моряктурал паччахӀлугърал наградартту дул-лалисса мажлис.

Ванин хасну хъхъирийх ита-бавкъуна Николай Толченни-ковлул каялувшиндаралусса Ка-



спийск шагърулийсса ОьрчӀал техникалул творчестволул центр-данул чӀава жамичитурал бивсса мюрши жамирду.

Байрандалул кьини М.Халиловул цӀанийсса паркраву кьинибархан най дия хасъсса аьралий операциялул ишру нанисса кӀанттава дуркӀисса аьралий техникалул выставка.

Байран кьуртал хъуна салюту итадакъаврийну. Аьралий-хъхъирил Флотрал байрандалун хас дурсса концерт ккаккан дурна Каспийск шагърулул майданнив.

Ва кьини тӀайланнасса эфир-данувах парад ккаккан дурна «Дагестан» РГВК-лул.

Гьарца байрандали кунма, ва кьинигу хъуннасса хъар лар-хъуна агъалинал мюхчаншиву дузал дуллалисса ихтияр дуруч-чай органнал зузалтрал.

Имара САИДОВА

Июльданул 28-нийн – Аьрасатнал Аьралий-Хъхъирил Флотрал кьини, Цалчинмур каналданий «Доброе утро» передачали ккаккан дурини цалчинмур ранграл капитан, аьралий бутӀрал ветеран, МахӀачкъала шагърулул аьралий комиссар, КӀундиннал шяравасса Геннадий Кьурбановлул кулпатраясса сюжет. Ванил хӀакъираву чӀиви-хъунсса ихтилат бударду Геннадий Кьурбанов-лул кулпат ПатӀимат Кьурбановашал.

ВМФ-рал Кьинилун хасну

## Лас хӀаписарну усса чӀумал



Геннадий ва ПатӀимат Кьурбановхъул

Ванин шиннигару хъинну кӀулссар ва Флотрайсса кьуллугъ-рая. Ва кьуллугърай Геннадий Шихаьлиевичул гьан дурсса 35-ния лирчусса шиннардива 26 ши-най ванащал хъачӀ-хъачӀрай дир-хъуну кьуллугъ буллаи бивкӀссар ПатӀиматту. Ванил дур «главный старшина» тӀисса аьралий ца. 1988-ку шина 2014-ку шинайн бианнин ПатӀимат кьуллугъ бул-лай бивкӀссар ВМФ-рал Ухсавни-лий флотрал личӀи-личӀисса аьралий бутӀраву, строевой бутӀлуву – делопроизводительну. Аьралий пенсиялийн бивкӀкун махъ Архан-гельскаллас областрайсса Северодвинск шагърулул военкома-трайгу зий бивкӀссар.

– Цалчинмур каналданул бри-гада бивкӀуна жучӀан. Аьра-сатнал Аьралий-Хъхъирил Фло-трал кьини жул кулпатран хъун-насса агъамшиву дусса кьинир, жул кулпатрал оьрму цимигу ши-най ва кьуллугърацӀун бавхӀуну бивкӀссар. На 18 шинаву, шар хъуну, лавгра жулва билаятрал ухсавнийн, вания тинмайса ттул оьрмугу цимигу шинай бавхӀуну бия аьралий-хъхъирил кьуллугърацӀун. Ттул диялсса шинну ларгунни ласнащал аьралий гарнизоннай. ХӀаписарнал кулпатну бушиву – му пишари, лас гьарца кьини даврийн, ко-мандировкалийн тӀайла укки, кьарал дакъасса зузи кьинирду,

шану бакъасса хъхъурду, бигъа-лагай кьинирду дакъасса кьул-лугъ... Ца кӀанайн дахъва аьдат хъуну, кӀанттул хъуннин, бачин багъайва цамур кӀанайн, жул-ла думургу дартӀун, мюршисса оьрчӀащал. ХӀаписарнал кулпат-шиву хъинну захӀматссар, ялун бурувгун гьарзат дюрчӀуну, хъуй-ну чӀаларчангу. Ухсавний, гьан-маччаминная архну, тӀабиатрал захӀматсса шартӀругу, цаму-цатургу бивхӀуну. БакӀрайва тих жулва ватанлулвал къабикӀайва, махъ бивкӀуна, вания тиннай яла-гу ва чулуха цахъис бигъашиву, рахӀатшиву хъуна. Шиннардивун дакӀ буттал кӀанайн, ватандалийн хъиннура кӀункӀу тӀун диркӀуна. Пикри бивссия тарихийсса ватан-далийн бизан, хӀатта архну буну-гу, тачӀаввагу шихаллия ят бив-цун къабивкӀнугу, – буслай бур ПатӀимат.

Мяйжаннугу, Геннадий Ши-хъаьлиевичула эбрат ларсун, вана-л ххуллу ккаккан бивну, КӀундиннал шяравасса цимиягу жагъилнал цалва оьрмурду бавхӀуссар хъхъи-рил кьуллугърацӀун.

Геннадий Кьурбанов кьул-лугъ буллаи ивкӀссар Ухсавнил Флотрай, Мурманскаллас об-ластьрайсса Ведяево поселокрай, подводный лодкалий. ИвкӀссар командирнал кӀилчинма хъирив-чуну, Ухсавнил Флотрал атом-ный ракетардал жамирдал 9-мур эскадралул штабрал начальни-нал хъунама кумагчину, Ведяев-ский райондалийсса базирова-ниялул штабрал начальнинал хъиривчуну ва цаймигу кьуллугъ-ирттай.

Цуксса цӀакъсса, цуксса хъхъичӀунсса унугу адамина, ва-нал цӀакъсса мюхчансса кьинтга – кулпат, бикӀан аьркинссар, гьа-мин, вана укунсса кулпатнугур хъанахъисса ПатӀимат.

Геннадий ва ПатӀиматлул бур 3 оьрчӀ, оьрчӀал оьрчӀру.

Барча тӀий Кьурбановхъал кулпатрахъ Аьралий-Хъхъирил Флотрал кьини, чӀа тӀий буру гьар-ца дуллалимуниву тӀайлабацӀу, кулпатраву нахӀушиву ва чӀярусса ххаришивуртту.

Бадрижамал АЬЛИЕВА

# Лаккуй – чьвхъа-гъараллу

→ Дайдихъу 1 лаж.

Гъази-Гъумучиял ца ххуй-шивуну ва лишанну хъанахъисса Ханнал-Бярнил чӀюлушинна, лар-крал миллатрал тарихравусса ци-мивагу иширал бардулт шавши-лул мурхъру ва ххуллукъсса мур-чал ва гьарал гужиращал лавну бакъая. Вай гъагъаву бювххуна цинявпагу лакран.

Гъараллал къачансса зарал биан бивну бур ххуллурдангу.

– Мурчашалсса, микӀирашал-сса гъаралуннил биалсса ххул-лурдугу зия бунни. МахӀачкъала – Гъази-Гъумучи ххулий, ЯтӀул ламучӀан биявайсса кӀанай, ххуллул зума леркьунни. Ури-Мукъаривсса ххуллу, ххяли лер-къун, цаппарасса хӀаллайсса лав-къуну буссия. Мукума районда-лул цайми шархъавунсса ххуллур-ду бяххан бивсса, валтру дагъсса ишру цаймигу хъунни. Ххуллур-дащал архӀал, неххачӀан гъан-ну дарцӀусса гтарцӀругу лар-сун, ххаллу дурцун, Гъумучи ва цаймигу шяраваллурду чани бакъа лирчӀун дуссия. Хъунма-сса барчаллагъ, захӀматсса гъа-



валул шартӀирдах къабурвгун, инсантурал къатравун чани зана буллаи зий бивкӀсса райондалул электриктурал, – буслай ур Лар-крал райондалул бакӀчинал хъи-ривчув Явсупи ХӀамзаев.

Урувгнал дакӀ зия хъунсса кьия хъуну дия Инишиял ва Ви-раттиял СПК-рттал гъаттарай. ЛивтӀусса ризкьилул (оьллу, ниц-ру, чу) ккал 100-нийн лархъсса

дур: Инишиял – 54, Вираттиял – 40-ния ливчусса. Укунмавагу оьрму бутан, итталун дагъансса ккаккирттайн лахъан захӀматсса заманнай бигъа дакъасса ризкь-чинал касмулуха зузиминнан би-ялну шуркӀал хъунсса зарали ва. Циксса захӀмат къабувхъунессия, циксса харжлугъ дуккан къадур-хъунессия вайксса гъаттара хъуни баннин вайннуха зузиминнал.

Ккуллал райондалийгу нех-хал гъаттара лавсун бур тӀисса хавар шялусса бушиву, талихӀиннаран, райондалун гъа-рая хъунма зарал къабившиву бивсунни райондалул админи-страциялул бакӀчинал хъиривчув Анатолий Давдиевул. Мурчал Къяннал шяравусса Культуралул къатрал магъуйсса ца-кӀира ши-фер ларсун дур ва неххал Ваччав шяраваллил хозяйствалуву ишла буллалисса чӀиви-хъунсса ппал-лу лавсун бур. Агъуллащалсса дазуйн ва райондалийсса шар-хъал, мащал ххуллурдайн дирчу-ну дур Автодорданул управлени-ялул техника.

Бадрижамал АЬЛИЕВА

# Дюкъуллал, Ялув ЧӀатӀлухъиял ва Лув ЧӀатӀлухъиял шяраваллавунсса ххуллу неххал лавсун бур

Вай гъантрай гужсса гъараллу ларчӀун, Рутуллал райондалий  
Внехру дурккун, цаппара кӀанттурдай ххуллурду лавсун бур.

Ихрек тӀисса шяравату Дю-кьуллал, Лув ЧӀатӀлухъиял ва Ялув ЧӀатӀлухъиял шяраваллавун нанисса ххуллу неххал лавсун бур. Цанасса ппурттуву вай шяравал-лавун так бахъгта гьан бюхълай бур сайки 10 километралул ман-зилданий. Цаппара шяраваллаву чани бакъа ливчӀун бур. Ахттиял шяравату бивкӀсса энергетикту-рал, цӀусса тгаллу бивхъуну, чани бивну бур.

Хъунмур масъала бур лакрал шяраваллавунсса ххуллу ба-къашиву, ва ччяни дузал хъунсса масъала бакъар, цӀусса ххуллу биван багъанссар, тӀий бур кӀия



бивкӀсса инсантал.

ХӀасан АЬДИЛОВ

## Ккуллал райондалия ХъхъичІунсса выпускниктал лахъа-хъун бунни

Ккуллал райондалул администрациялул къатраву хъунни му-  
сил медальлай школа къуртал бувсса выпускниктал барча  
буллалисса мажлис.



Гъашину райондалий му-  
сил медальлай школа къуртал буну  
бур Ккуллал 2-мур школалул вы-  
пускнича Сиянат АхІмадовал ва  
Ваччиял школалул выпускнича  
Айша Уцумиевал.

Вай барча бунна райондалул  
бакЧинал бигарду чІумуйну биттур  
буллалисса Ажуб ХІусмановлул.

– Ххирасса оърчІрув, шко-  
лалий дуклакисса шиннардий  
зу ккаккан бунни дуккавриву  
итххавхсса, яхІ-къирият дусса,  
хъунанал хІурмат бусса, ххуй-  
ну тарбия бувсса оърчІру буши-  
ву. ДакІнийхтуну барчаллагъ  
учин ччай ура марцІсса ххювар-  
дай дуклай бивкІсса выпускник-  
турахъ ва, вайннан кІулшиву  
дуллай, хъунмасса захІмат бив-

хъусса учительтурахъ. Шко-  
лалия лавгун махъсса оърму-  
луву зун хъунадакълантІссар  
захІматшивуртту. На мукІруну  
ура, захІматшивурттал хъхъичІ  
ник къаришуну, райондалул-  
гу, республикалулгу ца лайкъ-  
ну дуручинтІшиверий, – увку-  
на ванал.

Выпускниктурахъ тІайлабацІу  
тІутІссса ва насихІатру буллали-  
сса ихтилатру бунна Райондалул  
кІулшиву дулаврил управления-  
лул хъунаманал хъиривмур Ами-  
нат Къянчиевал, нитти-буттал ва  
директортурал.

ОърчІал барчаллагъ увкуна  
цахъра дарсру дихълай бивкІсса учи-  
тельтурахъ ва гбарца ишираву мудан  
чІарав бивкІсса нитти-буттахъ.

## Дагъусттаннал паракъатшиву ва цашиву дуруччаву мурадрайсса къини

ДР-лул Конституциялул Къинилун хас дурсса ххаллилсса мероп-  
рияте дунни ЧІяиннал магирлулгърал къатрал хъунмур СалихІат Алх-  
совал. Мажлисрай гуртту хъунни дуклаки оърчІру.



СалихІат Алхасовал бувсуна  
Конституциялул тарихрая ва ва-  
нил агъамшиврия.

– Дагъусттаннай Конститу-  
ция къамул дурну дур 1995 ши-  
нал. Республикалий аьдатравун  
дагъну дур ва къини июль зурул  
26-ний лахъа-хъунну кІицІ ла-  
гаву. Ванил проект хІасул дав-  
ривух гуртту хъуну бур, Да-  
гъусттаннал ХІукуматрал ва  
Конституциялул мажлисрал  
члентал бакъассагу, ихтияр-  
далсса буллалисса аьлмтурал  
ва юристтурал группарду. Бай-  
рандалул агъамшивуну дур Дагъ-

усттаннал паракъатшиву ва ца-  
шиву дуруччаву мурадрайсса  
закон къамул давриву. Консти-  
туциялул тІалавшиннагу дур ва  
закон дуруччаву.

Республикалул ца агъаммур  
байран барча тІий, чІа тІий бура  
цинявннан цакъсса цІулушиву,  
цІу-цІусса хъхъичІуннайшивуртту,  
– увкуна ванил.

Муданна кунма, ва ххуллукъ-  
сса мероприятиялий чялиш-  
сса гурттушинна дурна дукла-  
ки оърчІал. Вайннал дуркуна  
назмурду ва ккаккан дурна тя-  
хъасса концерт.

«Лица патриотов» тІисса проектрал лагрулий МахІачкъала  
Шагърулул Мажлисрал депутаттал Эльмира Абиева, Ти-  
мур Аьлиев, Рашидбаг Оздемиров ва Белла Багъдуева бивунни  
СВО-лий къучагъну жан дулусса Вагъаб Багъауттиновлул кул-  
пат МайсаратлулчІан.

## «Виричунал кунна къянкъасса дакІгу, чумартсса тІуллугу дусса хъамитайпа»



Ванил хъамаллурохъ бувсу-  
на, цила ласнал аьпалун хас бун-  
ну, аьралитуран янна дурухла-  
хисса «Зов героев» тІисса цех  
тІивтІуну бушиву. Ва цехраву  
Майсарат бур аьралитуран гъи-

лисса гъухъри, ссурссу ларкъус-  
са, дахъра ца лажин чІалачІисса  
куклусса къяпри ва спальный ме-  
шокру бурухлай.

ЦичІанма бивкІсса хъамаллур-  
рангу ванил ккаккан бунна аьра-

литуран янна дурухлахисса цех.  
Майсарат цуппагу цІанихсса  
модельер-конструктор бур. Цуп-  
пагу хасъсса аьралий операция  
байбивхъуния шийнмай ласнал  
цинма пиш-каш бувсса янна ду-  
руххай машиналий аьралитур-  
ан янна дурухлай бур. ЦІана  
ванил цех гъарта-гъарза хъуну  
бур. Утти Майсаратлун аьра-  
литуран янна дурухлан кумаг  
буллай бур чІаххув-чІаравми ва  
мачча-гъанми.

Майсарат, цуппа тгучан-  
най лавгун, чурххан тІааьнсса,  
кІукІлусса яннарду дурчІуну,  
бурухлай бур аьралитуран гъухъ-  
ри. Гъухъри буруххансса янна  
машан ласун ванин кумаг бул-  
лай бур хасъсса аьралий опера-  
циялий аьпалул хъусса аьрали-  
турал ниттихъул ва кулпатру.  
Аьралитуран янна дурухлахис-  
са акциярттал хъунмур харжлугъ  
дуккан дуллай, мудан чІарав  
ацІлай ур ванил ласнал уссу Ха-  
лимбаг Багъауттиновгу.

Депутаттурангу Майсарат-  
лул ккаккан дурна СВО-лийн  
тІайла дуккан хІадур дурсса ян-  
налул партия.

– ХІакъинусса къини цума-  
цагу инсаннаша цацава шайсса  
кумаг бан буюхайссар жула аь-  
ралитуран. Цинявннан хІисав  
шайхъунссар хасъсса аьралий  
операциялий гуртту хъанахъ-  
исса аьралитуран чялишну ку-  
маг буллай, чІарав бацІлацІисса  
чІявусса душру-хъами. Майса-  
рат Багъауттиновагу миннавас-  
са хІакъсса патриот бур. ЧІалай  
дур ванил дуллалисса давурт-  
ту аьралитурара аякъалийсса ва  
дакІнийхтунусса душиву. Май-  
сарат бунялагу бур вирттаврал  
кунна къянкъасса дакІгу, чума-  
ртсса тІуллугу дусса хъамитайпа.  
Лайкъсса тарбия дуллай, патри-  
от зумуну хъуну буллай бур цила  
арс ва душгу, – увкуна Эльмира  
Абиевал.

Депутаттурал Майсарат-  
лул захІматран лайкъсса къимат  
бишлай, буллуна ванин «За па-  
триотизм и активную граждан-  
скую позицию» тІисса Барчал-  
лагърал чагъар ва аьралитуран  
гъухъри буруххансса янна машан  
ласунсса арцугу.

## ЦІуссалакрал райондалия

## Ккаккан бунни хІакъсса патриот ушиву

ХІакъинусса къини жула  
ХІабилайтрай хъанахъисса  
иширттаву агъаммур дур хасъ-  
сса аьралий операциялул тема.  
ЦІуссалакрал райондалия та-  
мансса жагылтал бур чІярусса  
шиннардий оьбалартту бухІлай  
бивкІсса агъали неонацизмалия  
мурахах буллай. Ва ххуллукъ на  
бусан ччай бура хасъсса аьралий  
операциялий гуртту хъанахъ-  
исса ДучІиннал шяравасса сер-  
жант Муса Аьзиевлуа.

Оьрмулул 58 шинавусса Му-  
сал, хушрай лавгун, чирчуну дур  
СВО-лий гуртту хъунсса кон-  
тракт. Ваниннинг, ларгсса ши-  
нал, командировкалий ивкІун ур  
Луганскалал Халкъуннал Ре-  
спубликалий. ВСУ-рал лекъа-  
пІякъу бувсса шагъурдал ва шя-  
раваллал инфраструктура цІу  
дуккан даву мурадрай, «Мос-  
газ» АО-лул тІайла бувсса пи-  
шакартурал бригадалувух Му-  
сагу ивкІун ур. Та ппурттуву  
ванан асар хъуну бур тайннал  
инсантурачІа ххишала бакъа



Муса Аьзиев

хІурмат-къиматрайсса, къучагъ-  
ну аьралий бигарду бартбигъла-  
гисса, агъали неонацизмалуца  
мурахах буллалисса жула жагыл-  
тал. Ватандалул мурадру хъхъичІ  
ххуттай бивхъусса жагылтурал  
гъира бувтун, цІунилгу СВО-  
лийн занахъунсса пикри буну  
бур Мусал.

Июль зурул 1-ний хІукму бун-  
ну бур Муса Аьзиев автомобиль-  
ный взводрал шоферну итансса.  
Майкоп шагърулия лавгун ур ва  
хасъсса аьралий операциялий  
гуртту хъанан.

Шиккува кІицІ лаган, къа-  
чІявусса бухъунссар ванал оь-  
рмулувусса, тийх хъанахъимур-  
гу ккакксса, цивппа рязину хасъ-  
сса аьралий операциялий гуртту  
хъун гъан ччисса инсантал.

ИчІува Мусах ялугълай бур  
кулпат ва кІива оьрчІ. Ци бан-  
ссия, вайннангу рязи хъун багъ-  
ну бур, хасъсса аьралий опера-  
циялий ххувшаву ласун, цува  
хІакъсса патриот ушиву ккак-  
кан буваву мурадрай аьралий  
политикалул ххуллу язи бувгъу-  
ну бувсса хІукмулушал.

ЧІа учинну жула виричун-  
нан, ччясса мутталий ххувша-  
вугу ларсун, цІуллу-сагъну пала  
ужагърайн занашаву.

Лажин хІадур дурссар  
Имара САИДОВАЛ



ХъьичИа-хъьичИ муххал ххуллу бихълан лавгун ур Тамаза тИсса жагьил. Ванал ппу ивкИун ур Арчил тИсса гуржиричу, нину - сунбатИлишар Аьшат. Буслан бикИай, Тамаза муххал ххуллучинал сянат лахъьин Ингилиснавунгу лавгессия тИй. Ва зий ивкИун ур Ростоврая Владикавказраин, Саратовраин бияннинсса муххал ххуллий ва цала 2-гу арснаягу хьуну бур муххал ххуллучитал.

1885-ку шинал Аьрасатнал паччахИ Александр Шинал итабавкъуну бур 12,5 млн. къуруширттал Ростоврая Бакуин муххал ххуллу бишин. 1893 шинал муххал ххуллу бивсар Порт-Петровскалийн, яла МахIачкъалалив, 1899-кусса шинал - Бакуин. Та чIумал «Аьраблинка» тИсса Азирбижаннал станциялий, Грозныйлийн, Назраннайн, Батайскалийн бияннин сунбатИул зий бивкИссар.

СунбатИлия хъьичИа-хъьичИсса мастер хьуну ур Мурти Саймаев тИсса адамина. Ва оьрмулхун зий уссия тIар Батайскалийн путевой обходчикная, хьунама мастернайн ияннин.

Ванал хъирив, Ростоврай училищагу бувккуну, муххал ххуллу мастер хьуну ур Ибрагьим Ибрагьимов. Зий ивкИун ур «Мамедкъала» тИсса станциялий. «Ирбул-Ламу» ва «Булагъ» тИсса, ванал бан бувсса кIанттурду бур цIанагу шикку. Ванал чIявусса сунбатИуллан кумаг бувсар муххал ххуллий даву лякъьин.

Ванаяр мукъах Мамедкъалалив, яла МахIачкъалалив мастерталну зий бивкИссар Аьбдул Аьбдуллаев, ванал уссил арс Оьмар МахIмудов ва цаймигу.

Колхозру хьуннин «Кабак-Аьбдуллу», цала жилива арцу дуллуну, машан ларсун дур 1700 гектар аьршарал цала уссил арс Аьлилул чIаххувсса ккуллал яттил кIилакин дуллан, 1935-ку шиналнин арендалий пудра трай. Муххал ххуллийн цалчин лавгун бур шярава Адухъул, СалихИхъул, Насруллагъхъул.

1960-ку шиная шийнмай Дагъусттаннал муххал ххуллу бур сунбатИуллал канихъ. ХъьичИа-хъьичИ муххал ххуллу инженер хьусса Рамазан СутIаевлул Ухссавнил Ккавказуллал МахIачкъалаллал дистанциялул хьунаману 20-хъайсса шинну дурссар. Рамазан техникалул элмурдал кандидатри, муххал ххуллул тягалул генерали.

Дарбантулаллал дистанциялул хьунаману 30 шинай зий ивкИссар Мямма СултIанов, кадралул отделданул хьунаману, Жамалуттин Оьмаров, муххал ххуллул ревизорну - ХIасан Оьмаров, Сапар Мусалаев ва цаймигу. Грозныйлив 70-ку шиннардийн ияннин мастерну зий ивкИссар Муси Мусиев.

Таний Рамазан СутIаев, цIана Адамов Захар РИИЖТ-равун (Ростовский государственный институт инженеров железно-дорожного транспорта) целевойсса направленияду дуллуну, ва институт къуртал бувну, муххал ххуллийгу, халкъуннал хозяйствалул отраслирдайгу зий бивкИссар, цIанагу зий буссар 35-нная ливчусса сунбатИуллал арамтал ва душру-хъами. РИИЖТ-раву физик-математикну чIярусса шинну дурссар дарс-

Муххал ххуллучинал пишалул къьини

## Барча, СунбатИул, байран!



**СунбатИуллал шяравалу, Дагъусттаннай дакъагу, Аьрасатнавугу гьарнан кIулссар цIа дурксса муххал ххуллул устартурал мина душиву. 160-хъул шинну хьуну дур вайннал муххал ххуллийн зун лавгун. СунбатИлия бувккун бур муххал ххуллучитурал 32 династия.**



Захар Адамов

Аьрасатнавугу дакъахьунссар хIукуматрал 17 ларайсса награда – Лениннул орден, ЯтIул ттугълил захIматрал 7 орден ва цаймигу бахшишру ларьссса шяравалу, СунбатИул бакъасса.

РИИЖТ-гу бувккуну, зий ур Захар Адамов. Институт къуртал байхту, Захар зий ивкИссар Грозныйлий паркрал дежурныйнал хьунама инженернайн иянцIа. Ва ур Ростовуллал муххал ххуллул отделениялул хьунаманал 1-ма хъиривчугу.

Дагъусттаннай цир, Аьрасатнавугу дакъахьунссар хIукуматрал 17 ларайсса награда – Лениннул орден, ЯтIул ттугълил захIматрал 7 орден ва цаймигу бахшишру ларьссса



Рамазан СутIаев



Мямма СултIанов

мил Манаповлул ларьссар Лениннул орден, 1943-ку шинал – Лениннул 16 орден хъазамрай ларчIссар 16 муххал ххуллучинал, 11 сунбатИичу лайкъ хьуссар «Почетный работник путей сообщения» тИсса цIанин, 2 хьуссар «Тягалул генерал»

1948-ку шинал Лениннул орден ларьссар Садикь Оьмаровлул. Ва зий ивкИссар Ростоврая Бакуин бияннинсса муххал ххуллул отделениялул хьунама ревизорну, ВКП «б»-лул обкомрал хъьичИра-хъьичИ тIиртIусса отделданул (промышленностьрал ва транспортрал) хьунаману, хьуссар «Тягалул генерал». Чирисса СунбатИуллал шярава хьуссар 2 генерал.

МахIачкъалалив ххуллул (ПЧ-лул) мастерталну зий бивкИссар Исапил Исапилов, МахIаммада Расулов. Муххал ххуллул отделениялул экономисталну, бухгалтерталну, поездрал проводничахъулну, кассирталну зий бивкИссар 13 хъамитайпа.

«Славалул 2-мур даражалул орден» ларьссар АьбдурахIим ХIамзаевлул, 3-мур даражалул-мунингу ккаккан увну 1 барз хьуннин, Совет хIукумат лирну, къаларьссар. Къизлярдайх муххал ххуллу бихълахъийни Къаякентуллал мастер Гьарун Мирзаевлул «Орден дружбы народов» дуллуссар.

Гьар шинах августрал хъьичИра-хъьичИсса алхIаткъьини хъанахъиссар СССР дунийгу, ттигу Муххал ххуллучинал къьинину.

*СунбатИул, СунбатИул,  
ТалихИрал минай!  
Муххал ххуллучитал -  
ЗахIматрал агьлуй!*

Барча зул ххаллилсса къьини – Муххал ххуллучинал байран!

**МахIмуд АьЛИЛОВ,  
ш.СунбатИул**



Оьмар МахIмудов

ру дихълай сунбатИичу Муса МахIаммадовлул. ЦIанагу ванал душ Наташа, элмурдал докторгу



Садикь Оьмаров

хьуну, зий буссар тивува. ЦIанасса Дагъусттаннал муххал ххуллул хьунаману,




Закарижа Аьбдулхалимов

шяравалу, СунбатИул бакъасса. ВКП «б»-лул Обкомрал 3-ма секретарьну зий ивкИсса Ка-

Муххал ххуллучинал пишалул кьини

# Барча, СунбатІул, байран!



Юсуп Аylimов



КурбанмахIаммад Вагабов



Малла Дибиров



Юсуп Магъдиев



Илияс МахIаммадов



Мусалав МахIаммадов



Оьмар МахIмудов



Оьма Мирзаев



Курбан Оьмаров



Аьбдуллагъ Рамазанов



Курбан Рамазанов



Ражаб ХIажиев



Расул Хихучов



Исмйил Хуршиев

Мунал оьрчIалли, тIар,  
КIапКIайлияту  
Цалчин муххал ххуллу  
Буллай авчусса.  
Мунал оьрчIалли, тIар,

Цалчин СунбатIлив  
Муххал ххуллул янна  
Чурххайнгу лархсса.

Уттирив бакъассар  
Шяраву кьатта  
Акъасса кьатлуву  
Муххал ххуллучи.  
Утти, гьич, кьялякьай  
Шяраву цучIав  
Муххал ххуллий кулунг  
Галай кьадурсса.

Буссар миннавугу  
ЗахIматрал вирттал,  
Пагьму-гьунарданул  
Хьинну паргалсса.  
Чаннаннил ххуллурдай  
ЗахIматру бувну,  
Лениннул орденну  
Хьязамрай ларчIсса.

Дуссар жул шяраву  
Уттигу аьдат  
Ппухьлуннал кьариртсса,  
Муххаяр цIакьсса.  
КIира ччисса тIутIул  
Мурадрал шанийн  
Муххал ххуллучинал  
Кьяпа бутайсса.

Дуссар жул шяраву  
Цамургу аьдат,  
ИвкIума ласайсса  
Буттал шяравун.  
Мунах бацIан байссар  
Бюхттулсса чару  
Муххал ххуллул лишан  
Варакьрай дурксса.

Агь, ххуллул устгартал,  
ЗахIматрал вирттал,  
Уссания нава  
Кьудратрал заллу.  
ДацIан давияв зун  
На мусил гьайкал,  
Шяраваллил дянив  
Зиярат буллан.

**Башир ХIАЖИКЪУРБАНОВ,**  
ш. Дарбант. 1992 ш.



Режиссертал М/ Сулайманов ва Н.Чекин СунбатIуллал шяраваллия киносурат ласлай

## Тамаза

Ванияр ттуршлийсса  
Шиннардил хьхьичIва  
Маэшат бан ппухьлу  
Лагайсса бивкIссар.  
ИвкIссар цагу лавгун  
Тамаза тIисса,  
Аьрасатгу бивтун,  
Ингилиснавун.

Та чумал арсавран  
Дулайсса диркIссар  
Буттая бутIурайн  
Хьарас ва ххаржан.  
Тамазалгу цала  
ОьрчIан кьариртссар,  
Муххал ххуллул сянат,  
Бурсавсса касму.





ИТНИ, 5 АВГУСТ

05.00 Доброе утро.
09.00 Новости.
09.20 «Молный приговор».

22.00 Т/с «Трейлер». (16+).
23.00 «Большая игра». (16+).

ТТАЛАТ, 6 АВГУСТ

05.00 Доброе утро.
09.00 Новости.
09.20 «Молный приговор».

22.00 Т/с «Трейлер». (16+).
23.00 «Большая игра». (16+).

АРВАХИ, 7 АВГУСТ

05.00 Доброе утро.
09.00 Новости.
09.20 «Молный приговор».

22.00 Т/с «Трейлер». (16+).
23.00 «Большая игра». (16+).

ХАМИС, 8 АВГУСТ

05.00 Доброе утро.
09.00 Новости.
09.20 «Молный приговор».

21.00 «Время».
21.45 Фантастика. (12+).

НЮЖМАР, 9 АВГУСТ

05.00 Доброе утро.
09.00 Новости.
09.20 «Молный приговор».

21.00 «Время».
21.45 Фантастика. (12+).

ХХУЛУН, 10 АВГУСТ

05.30 «Доброе утро». Суббота.
06.00 Новости.
09.45 «Слово пастыря».

00.50 «Подкаст.Лаб». (16+).

АЛХИАТ, 11 АВГУСТ

05.10 «Подкаст.Лаб». (16+).
06.00 Новости.
06.10 «Подкаст.Лаб». (16+).

РОССИЯ 1

ИТНИ, 5 АВГУСТ

05.00 Утро России.
07.35-07.41 Вести-Дагестан.
08.07-08.10 Вести-Дагестан.

ИМЕНИ ВЕСНА. [16+]
02.55 Телесериал «Василиса».

ТТАЛАТ, 6 АВГУСТ

05.00 «Утро России».
07.35-07.41 Вести-Дагестан.
08.07-08.10 Вести-Дагестан.

ИМЕНИ ВЕСНА. [16+]
02.55 Телесериал «Василиса».

АРВАХИ, 7 АВГУСТ

05.00 «Утро России».
07.35-07.41 Вести-Дагестан.
08.07-08.10 Вести-Дагестан.

ИМЕНИ ВЕСНА. [16+]
02.55 Телесериал «Василиса».

ХАМИС, 8 АВГУСТ

05.00 «Утро России».
07.35-07.41 Вести-Дагестан.
08.07-08.10 Вести-Дагестан.

01.00 Турецкий хит «БАХАР. ПО ИМЕНИ ВЕСНА».

НЮЖМАР, 9 АВГУСТ

05.00 «Утро России».
07.35-07.41 Вести-Дагестан.
08.07-08.10 Вести-Дагестан.

Осипов, Максим Житник и Александр Бухаров в фильме «По имени».

ХХУЛУН, 10 АВГУСТ

05.00 «Утро России. Суббота».
08.00 Местное время. Вести-Дагестан.

04.05 Ксения Романкова и Артём Ткаченко в фильме «Южные ночи».

АЛХИАТ, 11 АВГУСТ

06.10 Эмилия Стивак и Алексей Зубков в фильме «Жила-была Любовь».



ИТНИ, 5 АВГУСТ

04.35 Передача на агулском языке (12+).
05.05 «Служа Родине» (12+).

02.45 Д/с «Союзмультфильм-85».

ТТАЛАТ, 6 АВГУСТ

04.20 Передача на табасаранском языке «Мил» (12+).

02.30 Д/с «Союзмультфильм-85».

АРВАХИ, 7 АВГУСТ

04.15 Передача на лакском языке «Аьриши ва агьлу» (12+).

02.15 «Сделано в Дагестане» (12+).

ХАМИС, 8 АВГУСТ

04.15 Передача на даргинском языке «Адамти ва замана» (12+).

00.55 «За скобками» (12+).

НЮЖМАР, 9 АВГУСТ

04.15 Передача на аварском языке «Паданни гамалти заманти» (12+).

23.00 Время новостей. Махачкала.

ХХУЛУН, 10 АВГУСТ

04.50 Проект «Блинком. Некоторые любят погорячее».

01.15 Передача на дагестанском языке «Халк ва заман» (12+).

АЛХИАТ, 11 АВГУСТ

04.50 Проект «Блинком. Некоторые любят погорячее».



ИТНИ, 5 АВГУСТ

04.55 Т/с «Улины разбитых фонарей». (12+).

00.00 «Маска». (12+).

ТТАЛАТ, 6 АВГУСТ

04.50 Т/с «Улины разбитых фонарей». (12+).

00.00 «Маска». (12+).

АРВАХИ, 7 АВГУСТ

04.55 Т/с «Улины разбитых фонарей». (12+).

03.15 Т/с «Пляж. Жаркий сезон».

ХАМИС, 8 АВГУСТ

04.50 Т/с «Улины разбитых фонарей». (12+).

06.30 «Утро. Самое лучшее».

НЮЖМАР, 9 АВГУСТ

04.40 Т/с «Улины разбитых фонарей». (12+).

07.00 Российская дипломатия.

ХХУЛУН, 10 АВГУСТ

05.10 Т/с «Улины разбитых фонарей». (12+).

07.00 Российская дипломатия.

АЛХИАТ, 11 АВГУСТ

05.15 Т/с «Улины разбитых фонарей». (12+).

## «Илчилул» календарь Ва нюзмардий бувссар:

\*\*\*

Июль зурул 29-нний 1948 шинал увссар жяматийсса иш-ккакку, ДР-лул паччахИлугьрал кьуллугьрал лайкь хьусса зузала **Шамил Акаев**.

\*\*\*

Август зурул 2-нний 1972 шинал увссар ДР-лул Халкьуннал Мажлисрал депутат **Камил Давдиев**.

## Мирза Давыдовлул юбилей барча дулла



**Н**иттил увну 85 шин шав-рищал, чIа тIий ура вин ккаквузуллул цулушиву, дагьусттаннал оьрмулул лахьшиву, давриву хьхичIуннайшиву, кулпатраву талихI!

Яраппий, я Аллагь, вин 95 шин дуллалисса кьини дучIаннав! Лакрал тариху, мазгу цIакьну ябуллалисса шаэртуралу, чичултралгу чIирисса дастталул бакIчигу, ниттил мазрал «символика» ядаймагу ина ура, вихьхун цIулушиву дулуннав! Вайннул ца барашинна дулла дур, танива на лавхьхуну, уттигу дакIнийнувасса, вил «Лакку чIу» тIисса назмулул:

*Зизлай бур дакIнил чIурду  
ттул ялун вил мазрая,  
Зизайсса кунна интту  
багьравун тIутIал гьарал,  
КьатIув марххала буна,  
инт дайдихлахьиссарив?  
ЛухIи тIутIул чIапIава  
булбул балай тIиссарив?*

*Чагурданул синттурив  
ттул кьюкI хьазамравусса,  
Вил чIугу тазанакрив,  
ми зурзу тIутIи дурсса  
КьакIулессия лакку маз  
ваксса нацIусса бивкIсса,  
ДакIнивусса пикригу,  
дардегу бусан бюхьайсса.*

*Уча, душ, балай уча  
ччавриха, хьинишвируха,  
Дунияллийх леххувча  
лаккудушинил лакку чIу!*

Ва балай бучIия магьирлугьрал идарартгал репертуарданул вирдакIну хьун, балайчитурангу щаллу буллан.

Вил кьинилун хас булла ура вай ххаругу:

*Ниттил накIлил увчусса,  
Лакрал зунттав хьун хьусса,  
Мухьлукьатрал патриот,  
Зумув насихI маз бусса.*

*Шанан акьа кIараллий  
ТакIуй бакI кьадишивуй,  
Вил ххаллилсса оьрмулун  
Так тирхханну ккаккивууй!*

*Ина саннардудара  
Аьрай шагьид хьунаха,  
Кьуману ливчIуминнал  
ДакIру рахIат дувансса.*

*Дулуннав вихьхун кьудрат  
Лакку маз ахттар буллан,  
Дулуннав каши Заннал  
Лакрал халкь ххари буллан.*

**МахIмуд АБЛИЛОВ,  
ш. СунбатIул**

## Баян

«Илчилий» бишлашисса барча бавуртгал тексту буссар  
укуннасса барча баву – 400 кь.  
суратрашалсса барча баву – 500 кь.

## Апанни Кьапиевлул чивчумур ккалай

Республикалул Халкьуннал творчествалул кьатлул ттигьанну итадаркьунни «Читаем Эфенди Капиева» цIанилусса флеш-моб. Вай гьантрай ванивух гьуртту хьунни республикалул Дахадаевский район.



Хьуннасса чичу, прозаик, шаэр-таржумачи Апанни Кьапиевлул 115 шин шаврин хасну зузи дурсса флешмобри ва. Дахадаевский райондалийсса Морское тIисса шьяравусса Аьрасатнал Халкьуннал аслийсса культуралул центрданийн бавтIминнал, хьунмурчIин ду-клаки оьрчал, бувсуна Апанни Кьапиевлул оьрмулия ва творчествалия, дагьусттаннал ва совет литературалуву ванал бивхьусса хьунмасса бутIуя, дуркуна шаэрнал назмурду. ХIадур дурну дия луттирдал «Апанни Кьапиевлул 115 шин» тIисса цIанилусса выставкагу.

Ваниннин хьхичI ва флешмобравух гьуртту хьуссар Сергокьалалал райондалул дуклаки оьрчIру. Флешмобрал дайди хьу дурмигу вайри.

Уку-укунсса давуртту дуллалиссар махьа нанисса никиран цалва тарих, цалла культура кIулну дикIаву, цалла ватан ххирану тарбия шаву мурадрай.

**Бадрижамал АБЛИЕВА**

Кулпатрал шинан хасну

## Мария Монтессорил 19 насихIат-аманат

Нитти-буттансса

XX-мур ттуршукулул лахьшиврий оьрчIру тарбия баврил аралуву сайки революция хьун дурсса педагогтуран хIакьину ккаллину ур мукьа инсан: американал Джон Дьюи, немецнал Георг Кершенштейнер, италиянал Мария Монтессори ва Совет Союзрал педагог Антон Макаренко. Нитти-буттансса маслихIатрал ххуллий ялавай жу кIицI буллалисса вай кутIасса насихIатиртгал заллуну бур Мария Монтессори. Вай бур махьру чансса, мяьна куртIсса маслихIатру-аманатру. Ххал бара зувагу вайннува ци язи бугьан бурив, ци лаласун бурив.



**Мария Монтессо**

душшиврух ва ччаврих луглан.

14. ОьрчIая тачIавагу кьахуйну гьалгьа мабаванну – га цува унийгу, акьанийгу.

15. Зулла хьунмур кьулагьас дуллалияра оьрчIавусса ххуйхьинмуних, му чIумал кьахьинмунинсса кIану цийнува цуппа бухлаглантIиссар.

16. Гьарца чIумалгу вичИдилушара оьрчIал зухьва тIимуних ва цIухлахимуних, чара бакьа жавабгу дулувара.

17. Агарда оьрчI цашава итхьявхсса гьалатI гавацIана ягу цахь махь бакьин булла ухьурча, чара бакьа бувара мунил хIурмат.

18. Мудангу хIадурну бикIияра ссал-унугу хьирив лаян хIарачат буллалисса оьрчIацIун кабакьин ва личIину итгалунгу мабагьаванну гьарзатрал хьирив лаян бювхьусса оьрчIал.

19. Мудангу кумаг буллалияра ттинин кIулну кьабивкIмур кIул буллалисса оьрчIан. Булувара му кумаггу хьуннасса аякьалий, паракьатну, ччаву ххишалану.

20. ОьрчIашал зана-кьулу хьанхьийни, хIарачат булувара дурччин ххуй-ххуйми хасиятру, ккаккилун дилушара зуворасса язи-язими тIуллу, тIабиаьт.

**ХIадур бувссар  
Руслан БАШАЕВЛУЛ**

1. ОьрчIан зат лахьхьин байссар миннал лагма-ялтгусса затиртгал.

2. Агарда оьрчI чIявуну дащуй ихьлай бухьурча – ганангу лахьлантIиссар цайминнай аьйрду ляхьлан.

3. Агарда оьрчIая чIяруну цIарду дуллаи бухьурча – ганангу лахьлантIиссар цайминнал кьимат бишлан.

4. Агарда оьрчIал хьхичI ччалаччаву ккаккилун дихьлай бухьурча – ганангу лахьлантIиссар иллан.

5. Агарда оьрчIахь даччин дакьа, марцIну гьалгьа тIий бухьурча – ганангу лахьлантIиссар тIайлану кьушчу тIун.

6. Агарда зу чIявуну оьрчI санакьул уллай бухьурча – га хьанантIиссар сикьавсусса, льякIусса.

7. Агарда оьрчIан чIалай бу-

хьурча цува урувчуну ушиву – гагу яхьанантIиссар дакI дарцIуну.

8. Агарда зу оьрчI чIявуну кьаькьлун ихьлай, кьюкьин уллай бухьурча – ганан цана цува чIалантIиссар тахсирдал увгьусса инсан куна.

9. Агарда зу оьрчIая чIяруну цIарду дуллаи бухьурча, ганан лахьлахьиссар цалва кьадру цанма кIулну яхьанан.

10. Агарда зу оьрчIай хьусса аьйрдал ялтту бучIлай бухьурча – ганангу лахьлахьиссар ссавурданий яхьанан.

12. Агарда зу чIявуну оьрчI яхIливун утлай бухьурча – ганангу лахьлахьиссар яхI ххину яхьанан.

13. Агарда оьрчIан чIалай бухьурча цува акьа чара бакьасса ушиву ва мунийн бувну аякьалийн лавсьсагу ушиву – ганан лахьлахьисса цува усса дунияллий



Адабиятфал  
лаҳини

\*\*\*

Ина силул ччучивуй,  
Кикьунтталу банавшай,  
Вишчал дурсса ттул эшкьи  
БакГуйн дуккан дурари.

\*\*\*

Ися идавс архІалну  
Лахъан хъурдай меъражрайн,  
Малаиктал жям бувну,  
Заннахъ ина чІа учин.

\*\*\*

Царай тІутГив дури тІар  
Ися идавсил гъаттай,  
Нарза ласун лавгсса най  
ТІутГувува личІайсса.

\*\*\*

Царай уртту дури тІар  
Алжаннул багъирдаву,  
Авлий лавгсса гъаттара  
ХІайран хъуну личІайсса.

\*\*\*

Ца ина ва на хъурдай,  
Ца вайлул лухччи хъурдай,  
Ина ва на жапирай  
Аърши-чару аьтІи дан.

\*\*\*

Лахъавав лахъ цІияллайн,  
Рутавив кІяла лачак,  
Вай шарнил жагълиттурахъ  
Дичлачи бавив цІарду?

\*\*\*

Къаччинал лархсса хъхъури  
Ччан бивзун руцавияв,  
Ччисса аьзиз гъалмагъай  
Нясив ансса кІулния.

\*\*\*

Къаччимагу, ччимагу  
Ччимур буслай къаивтун,  
Ччисса аьзиз гъалмагъай  
Хъувух ихълай бикІанна.

\*\*\*

ОърчІкъакъунттул чІу бури  
Тай суннал яхъалату,  
ОърчІнийра дурсса эшкьи  
Цунияр кІирири тІий.

\*\*\*

Эшкьи хъунан хъинни тІий  
Вил луттирай бухурча,  
Илагъий, шарнил дивир,  
На вия кърван хъуннав.

\*\*\*

На эшкьи дарчІуссари  
АрулцІалла аьршлуцІух,  
Арулазарда шиная  
БатГул къадан увкуну.

\*\*\*

На ччаву дарчІуссари  
ЦІу хІавилул мархлуцІух,  
Мархха аьвну гъарчагу,  
БатГул къадан увкуну.

# Лакку шаммарду



\*\*\*

Ина ва на, яруххуй,  
Ялугълай чув битаву,  
Гъарал лачІун чІал хъурча,  
Ялув Ххув Зал къаитай.

\*\*\*

Мусиву садапнияр  
Паракъат къашай ттул дакІ,  
Элмулун точкалуяр  
Утти цалий дарцІунни.

\*\*\*

Аьзиз, на бивчІан мабав,  
Эшкьилул ччуччин мабав,  
Ттул лухІи тІутГул яру  
ХъатГултрахъ хІачІан мабав.

\*\*\*

Ччаву хъуна вин ва ттун,  
На дуччав лухччинуву,  
Интту шюлли урттушач  
ЛарайчІин ххяхханссари.

\*\*\*

Бавай, цІубарз хъиннивав,  
ЦІу гъили баргъ хъиннивав?  
Бавай, цІубарзва хъинни,  
ЦІан хъхурду чанна дайсса.

\*\*\*

Ина кунма бакъара,  
Чассагуйх тІутІи дичлай,  
Гулаватилул дакІнийх  
Ттурлу даркьуну бура.

\*\*\*

Эшкьи хъуссагу бури,  
Ччаву хъуссагу бури,

Хъуну, чулийн къадурксса  
На кунмассагу бурув?

\*\*\*

Ссавруннайсса баргъ ва барз,  
Зу ссай тамашалийру,  
Эшкьи батГул дувайсса  
На бакъа къаккакссарив?

\*\*\*

Тти бувагу къагъанна  
ЦІахъардал-къуманивун,  
Ялтту ттурлу даркьуну,  
Лултту зунчал бухурча.

\*\*\*

Эшкьи хъунан чичайсса  
Дивирнал шеки-къалам  
Ца ттунния къачивчур,  
Гунттараву къакьивул.

\*\*\*

Ччаву хъунан дувайсса  
Мюталимнал савартту  
Ца ттунния къадурди,  
Элму хъамаритивул.

\*\*\*

Эшкьилия тур данна,  
Ччаврия ттупанг банна,  
Ххуй оърчІ, вишчал эшкьилий  
Гъазаватрай букканна.

\*\*\*

Та дуржагъирал цІарал  
Ина ччучлачи чІумал,  
Алжаннул чІавахъулттих:  
Му ласи, лавмарт, - чинна.

\*\*\*

ОърчІ, ина ухъунссара  
Ттун эшкьи хъуссари тІий,  
Къукъин данна на эшкьи,  
ХІисилттул дарайнияр.

\*\*\*

ОърчІ, ина ухъунссара  
Ттун ччаву хъуссари тІий,  
БатГул данна на ччаву,  
Чарвитул чаннаннияр.

\*\*\*

Хъхъиривух жавгъарнияр  
ДакІнивух ппив хъу эшкьи,  
Вил дакІниймур къакІулну,  
Ашкара дуван къашай.

\*\*\*

Утти на ницІал ялун  
ЗалакІгу къаккухІара,  
Къюкьала вин дуллуно,  
Къамул данна лухІи гъав.

\*\*\*

ЭшкьилуцІух цІу ларчІун,  
ЦІарал ччучлай къабивтун,  
Вийнма лама къашунну  
Ххассал хъуссарав, ххуй оърчІ?

\*\*\*

Аьраххуллун дяниву  
Арцул тавхана хъурдай,  
Ла-ялавай нанинахъ  
Ина цІухлай бикІаван.

\*\*\*

Агъ, ца-цасса макъ рутІай  
Вай ттул тІутГул яруннал,  
НухІ идавсил заманнай  
БувтІусса тІухІпаннияр.

\*\*\*

Ца ина тІий на бура,  
Азбардай бавицу цІубарз,  
На тІий чІявусса бури,  
ЗуручІа чаннацІукуй.

\*\*\*

Гъалмагъайл хъунна бавай,  
Вин алжан ччав, дуржагъ ччав?  
Вин алжан ччисса кунма,  
Ттунгу вил оърчІ чай ури.

\*\*\*

Алжан бачІай хІажитал,  
ХІаж бачІай хІурульэнтал,  
Мурад бачІай гъалмагъайл  
Ттун кІива бутІа бара.

\*\*\*

Агъ, ттул оьрму ччуччивуй,  
Ттуруллул хъирив бивзсса,  
БакІру лахъсса барзунттайх  
Гъава бувну ларгунни.

\*\*\*

Лухччи хъяхъа чин дурну  
Шюлли урттугу ххяххай,  
Гъай-жан, ина сававрай  
На хъяхъа чавай бура.

\*\*\*

Хъяхъа чивуй учайсса  
ХъункІултІутІуйн бакъаяв,



→  
На тІутІияв, тІуллу ххуй,  
Хъяхъа чавай къабитан?

\*\*\*

БакІрал ххуйми ххаллилли,  
Хъус чІяруми къудурди,  
Ххуйсса бавал къабувра,  
Хъус Заннал къадуллури.

\*\*\*

Жул ичІува жан бури,  
ЦІияллай маржан бури,  
Тавханттуву баргъ бури,  
ДаКІ паракъатну дури.

\*\*\*

На цІузурух ялугълай,  
ЦІубарз ттуй тамашалий,  
Шаннагу Заннал цІанийн,  
БавцІунийва личІара.

\*\*\*

Багъдадуллал багъраву  
Дарувран дукай сунув,  
Идавсихъ риттун дурну,  
Хъурдай вийх ва ттуйх дачІин.

\*\*\*

ДахІалай дакъарив  
Вил бакІрай лачак,  
КІизул, симандалул  
Лагма каяйсса.

ДахІалай бакъарив  
Вил чурххай гъухъа,  
Оърму ахир хъуннин  
Лавсса вил чурххайн.

ДахІалай бакъарив  
Вил ччаннай махІсив,  
Цила жан вияту  
Къурван дувайсса.

ДахІалай бакъарив  
Къатлул чІанкъатта,  
Ина ялтту занай,  
Сууссин бувайсса.

ДахІалай бакъарив  
Зул къатрал чІиртту,  
Дяркъу-гъилишиву  
Вия арх дайсса.

\*\*\*


ОърчІнийра хъусса ччаву  
Лажбар бувксса дикІайвав?  
Хъхъирий шюшлай бунугу,  
Валлагъ, лиххан дан къашай.

Жагъилний хъу эшкъилий  
Мусил шинзир дикІайвав?  
Цуксса кІункІу тІурчагу,  
Валлагъ, дуцан дан къашай.

\*\*\*

Ялтту ттуруллушал  
Ттул даКІ ларгунни,  
Чув акъа чулданий  
Вил ялув дацІан.

Лултту шарашушал  
Яру лавгунни,  
Щин дакъа чулданий  
Вин мякълин хІачІан.



Камилъ Чутуевул сурапту

\*\*\*

Хъурдай чаннасса ярагъ  
Вил ххира уссин булун,  
Качарданул чурххирал  
Заллу увайрив ккаккан.

Хъурдай вил нину ядан  
Багъраву лухІи тІутІуй,  
Вил лухІи тІутІул яру  
ХІачІан булайрив ххал бан.

\*\*\*

Цими бидав буривав  
Ва Лакрал билаятрай,  
Гъивулул бархІру аьвну,  
Гъунар буван къавхъусса?

Циксса вирттал буривав  
Гъумучиял шагърулий,  
Мискиншиву ххи хъуну,  
Чувшиву дан къавхъусса?

\*\*\*

Гъумучиял Къакъурнил  
Заллу ина унугу,  
Ттул чаргас уссурваврал  
На вин къабулунну тІар.

ПаччахІ-ханнал ххазина  
Чал кІиллуву бунугу,  
Ттул хъуни ляхъиндалул  
На вин къабулунну тІар.

\*\*\*

Гъумучиял душваврал  
Дарайлий мусий чичай,  
Ина дур шанна жуав  
На ссай чичлай бикІава?

Шагърулул аьлимтурал  
Луттирду гъалгъатІи бай,  
Вихъ гъалгъа тІий диркІсса даКІ  
Щишал гъалгъатІи дави?

\*\*\*

СурухІилул ссурсулий  
КІяла чинилул дарвач,  
Цал канил къабувгъуну,  
Бигъа къалаганссара.

\*\*\*

На яттичІа ухъурча,  
Щар вирттаврал къаритай,  
ЩарссаничІа ухъурча,  
Ятту бурцІил къабитай.

\*\*\*

Ва дуниял вил хъурдай,  
Вил ххуй яру ттул хъурдай,  
Вихва ялугъи бувну,  
Ласувияв на ина.

\*\*\*

Гъариб урттулгу дягъу,  
Уртту-тІутІалгу дягъу,  
Ина Лаккуйн учІаннин  
Качар чурххалгу дягъу.

\*\*\*

Бюрунттул дарвачрахун  
Пикрирдал гъиву руртун,  
Хъунаавкъунахъ буслай,  
Чаран лякъин шайссарив?

\*\*\*

Ва ца дури дикІул даКІ,  
КІигу цукун дачІиви?  
КІива бури щинал я,  
Ца вин цукун булуви?

\*\*\*

Вил иттав къабургара,  
Ттула янил къаччуччин.  
ТтиликІрах къабацІара,  
Нава хІайп тІий къаивчІан.

## Адабиятфал лаъсин



\*\*\*

Банавша, банавша тІий,  
На банавшалух луглай,  
Ччаврин дукай банавша  
Ччавхуврайра диркІун дур.

\*\*\*

Базаллуву читнияз  
Чиву ххуйсса гъалмагъай,  
Читлийсса тІутІинияр  
Ттуллу оърчІи мадуллав!

\*\*\*

Зул цІияллай баргъ бури,  
Жул цІияллай ххют дури.  
Зул цІияллайсса бургъил  
Къалагара на гъили.

\*\*\*

Ца умуд бур дунъяллий,  
Дигъалагру дулайсса,  
Хъус дума ва дакъама  
Гъаттал личІи къаайсса.

\*\*\*

Вил дунияллий хъунсса  
Ца азарда шин хъуви.  
Азаллий цалку щинал  
Чун гъанна, база мискин?

\*\*\*

Аман, на вай дардирдан  
Цу-цумунин ци бави?  
Духмур ялату гъаннин,  
ЦІусса ялун диллай дур.

\*\*\*

Янналулли чув айсса,  
Чалли исвагъи айсса,  
Ми цинявгу шялмахъур,  
Щарссанилли чув айсса!

\*\*\*

Чувра учин бигъассар,  
Щил-бунугу учайссар,  
Чувшиву дан захІматссар,  
Чувнал дакъа къадайссар.

\*\*\*

Маагъара яхІливун,  
Маххяххара цІаравун,  
Агъунавхъур яхІливун,  
Дува, лачин, чувшиву.

\*\*\*

Виричунал чувшиву  
Чулданийри кІул шайсса,  
Ххуй душнил чумартшиву  
Ласкъатлуйри кІул шайсса.

\*\*\*

Алмасрал муси лиллай,  
Сукул марцІ лачІа лиллай,  
Вил бавал ина лиллай,  
Шярал хъаннил на лиллай.

\*\*\*

Махънал оърму гъанссари  
Дунияллул хъус чІа тІий,  
Ина чІа тІий бикІанна,  
Дунияллий буссакекса.

Чивчуссар Р. БАШАЕВЛУЛ

## «Илчилул» архив ххилтү буллай

25 шинал хъхьичІ, 1999 шинал, хар-хавар бакъа Цуссалакрал райондалийн дуняллул террористь-турал кьукьри ххярхсса тарихрал иширан хасну кказитрай рирщусса язи-язими макъалартту.

# Цимийлли ва сситара жуйн ликкантІсса

## Аьрщи щарай дур

→ Ахир. Дайдихьу №28

Ца хъамитайпалун бавунни цила ссил лас ивкүшиву, лекълай бавчунни ванил чурх. Лагма-ялттуми га паракъат буллай бур. Хъунмайданнул зуманив чІалан бивкүнни цалчинсса автобус.

«Ссахлур жул арамтал талан аьркинса: жува хъяврив бувса хІукуматрахлурив, ягу жура укунгу-тукунгу къадитлатисса га аьршарахлурив!» тІий бур хъами. Арамтуран тІурча, му баллай бакъар, цахъхун ярагъ буллай бакъар тІисса бакъа цамур аьрза вайннал зумату буклай бакъар. Хъами буслай бур, цашава тиха цала арамтал буцин къавхушиву, буслай бур, тайннахъ циксса маз-къаз бивхуссарив, цуксса лергъ увкуссарив, циксса дъяви бувссарив. Къалавхуну бур. Сси бивзун бухунсар, къабизансса тагаргу дакъая тІарча. «Жул школалий учительтурув чачангу чІявусса буссарча, ми бия жухъ августрай гъашину дуккавил шин, сентябрьданий къадайдисинтІиссарча, октябрьданул цаннийри дайдишинтІисса тІий. Мугу ци махърива тІий буссияв, амма укун къаххива. Дарсру 1 сентябрьданий дайдишукунгу, вацир дайдишукуну тІий буссияв.

«Ахъарав къачагътал шяравалли администратиялул къатри дургуну шябивкүн бия. Тай жучІагу арх дакъа дуссарча, жун чІалай бия. Тивун увкІуна ца угъарасса адамина, мичиххич, тайннаш дъявай: «Зу шиккун циван бивкІру? Бувккун, насияра шичча! Битияра жу паракъатну», тІий. Уккан увна та тайннал, вил къуллугъ бакъарча, куну. Танал арсру бивкІун гуж-балагъ увцуну лавгуна шавай, сситтул ивчІавай дъявайсса адимина. Тай бия: «Жу зухъ цичІав тІий бакъару, ва жу оьруснайн къаршину буллалисса дъявир. Ччарча насияра шичча, ччарчагу, окопру дурккун, яхънахъияра тІий. Агъ, ца хъинахъа! Вай окопру дурккун цукъув яхъанай, къачагътал вайннал къатраву яхъанан аьркинну бусса бур.

Жул халичарду лавсун къатрава, цалва лув окопирттавун бичлай бия. Шанийхдихьурду, виргъаннал къатри шавурду дахІин ишла бан хъямала буллай бия».

Сакиншиннарал штабраву зий Сия Халкъуннал Мажлисрал депутат Неъматуллагъ Аьлиевгу. Ххуллункини кІюрххил ва лавгун ия Цуссалакун. «Телевизорданувух му хавар бавукун, жу (ттушал ттула уссу ва дусгу буссия) бавчуссияв тихун. Ссят аІунний кІюрххил жу Новолакран бивсса чІумал тикку битуххитурду дия, лихъачалт бия нех дирхьуну най. ОМОН бавцІуну бия чув буцири. Культуралул къатри пІякъ учин дунни тІий буслай бия. МукъцІалаксса инсан, битлай, къатІ буллай ливтІунни



тІий бия. Шаймуний шябивкІун, бувккун най бия инсантал шярава. Ахттая ссят кІира хъуннин жу тикку ливчІунав лихъачалт хъунабакълай, тайннан жуцава шайсса кумаг буллай. 2 ссятраву амру бувна, талатаву дайдихълахъиссар, инсантал хъхьичІа букъан аьркинсар куну. Мичча лавгун, Хасаврай кІура баяйсса кІанттай лихъачалтран кумаг буллай буссияв. Ца къыяма кыни дия тикку шихунмай наниннал чІявушиврул. Ххюннил дачІинний цІунилгу Новолакран махъунмай бивкІру, шяравун буххан къаст дуллан бивкІру. Амма къабивтунав. Занахъун багъуна.

Чан-чанну тІий, лихъачалт-рарчІан дуки-хІачІия-лийнуса ва арцуйнуса кумаг букІлан бивкІунни. Хъами бия, цанна дулайсса арцуканиша канихъхун цахъхунна дулара, шихъхун дунугу цаннахъхун дулурча, ми цачІанна къадиянтІиссар тІий. Арцул иш вайнначІа хъинну оьркину бур, канихъ арцу дусса сайки цучІав акъар: учительтуран я отпускной, я харжру буллуну бакъар, оьрчІансса арцурду 1996 шиная шиннай дуллуну дакъар. «КолхозниктурачІагу арцу ча дикІанссар», тІий бур. Цала думур продукты, дуки-хІачІия, ризки, къай-къуй ду-дуний ду-думур къадиртун бивкІун бур. Вайннахъхун депутат Аьлиев Неъматуллагълул махъ буллунни: цал цІа дургуну чачІанна бухъхъияра увкунни, гярца аьркинсса кумаг банна, цалчин цІана кумагран 25 азарда къуруш дулун най ура, яла бучІан ччисса бухъурча, Лаккуйн бивцуну, кІий кІантту бан хъунсар, куну.

Дайдихьу хъхъунил ссят кІиннийра хъуну дур. Хъхъудризалва Цуссалакрал мизитравун ми къачагътал байбивхуну бур ярагъ ххилай. Мизитту Ли-

пецкалия бивкІсса оьруснал аралуннал къуш бивщусса Культуралул къатрал чІаравари бусса. Му шуркІал хъуну, ми халкъ мивун циван бухлахиссар куну цІувххукун, мизитрал малланал, ва мубараксса кІанур, зун, оьруснан, шивун ярагъуннишал буххан къабучиссар куну, ялтту буххан ливтун бакъар. Му ппурттуву, лажин дуссун, къатІув букканнанисса шам ОМОН-далул оьрчІ бунийва бивтун бивчуну, яла вив бивххун гайминнайх цІу тІиртІуну дия. Миччари му бала байбивхъусса, миччари ми къачагътурал яла РОВД-лул лагма рургъуса. КутІану учин, му данну тІий дурсса къелли. Цалчин ххявххун бур ТІохчардал шяравун, яла, Гъамияхъхун, яла, занабивкІун райцентрданийн ххявххун бур. КІира ссятрава бомбарду бичлантІиссар тІий, шяравалу къаритан чІун дуллунни. Жул бугъарами инсантал гийхвар, жагъи-жугъулт, оьрчІру гийхвар, ласру-уссурвал гийхвар.

Циксагу ихтилатру буссия Чачаннал дазуцІух лагма инсантурал ккучунну цачІун хъанай дуртІутІисса. Гийх жул райондалийсса къакъри ва вацІри ккавкманал тасттикъ бантІиссар винма ччимур хъун бюхъайшиву. Дазурду цІакъ дурну дакъая. Шяравун бивххун махъ бакІра-бакІрах гярца милица ялапар хъаныхъисса къатравун лавгун битлай бичлай бия. Мичхъал инсан, шяравух боевиктурашал занай, цума чув ялапар хъанай уссарив ккаккан буллай ия тІар. БуттахъачІан нанисса кІанай ттун боевиктал итату иттав ххал хъуссар, минначІа кІа бакІрайн бияннинсса ярагъ бия, къяправува ккулларду бия. Жула оьрчІан аьркинну бивкІун бия, милицанал яннагу лирккун граждан янналуву занан, цан чирчан, милицанал янна дусса инсан

га ссят бивтун утлай бия. На вай ттула яруннин ккавкмурда бусла-сисса. Ми халкъ ца нюзмардул хъхьичІва, райондалийх занай, ялтту ккутІру, къакъри, лабикІан шайсса кІанттурду ххал буллай, сант рутлай бивкІун бур. Бушихъиял райондалийн ххявххса чІумал ми къачагътал личІишиву дакъа гярцагу къатравун бухлай бия тІар. Уттирив миннал цамур политика дур, гярца зат ХІасавравун лавсун ярагъ кІунттихъсса милицалтрая байбивхъунни.

Ярагъуннилу балгусса халкъ Ячани хъячиннин шяравун бивххун, лагма рургуну бия. КІюрххила цал кІичІирттавух ссукаІа битлай байбивхъуна. Милицанай зузисса оьрчІал сияхІ дурну, бакІра-бакІрах шаппай занай буккан буллай, къатІ буллай, машинартту зехлай бивкІун бур. КъатІув буккансса иш бакъая, цума чув уссарив, чув ци иш буссарив, сваяз дакъа чунчІав оьвчин хъанай бакъая. Яла тІун бивкІунни ца дачІи ссятрава бомбарду бичлантІиссар, зува сагъну чай бухъурчан, бакІру ххассал бара тІий, самолетру, вертолетру лехлан диркІунни. Цаппарассаннал къатравава, залухъругу буккан бувну, цанма ччи-ччимур буллай шябивкІун бия. Жуша миннахъ ссихІ дуккан бюхълай бакъая, миннал ци ба учирчангу бан баглай бия. КъатрацІух цІу шилай, тамансса ччурччуссагу хъунни. Жува гийх бунува милицанай зузиминнава ливтІусса 6-7 оьрчІ хъунни, уттигу ялу-ялун ливтІуми чІяву хъанай бур тІий баллай бур. Арс ивкІуну, нинугу, ппугу ганайн ка шун къабивтун, га уччин къабивтун, шихун тІайла бувккунни. Цийхра цурда ришлай Хасаврайра къаритарду нину. Жува ва бусса кушуй, оьрчІругу бивцуну, ца зат канил дугъан къархъуну, ду-дуний къариртун, гъаттарду авлахърайва къабивтун, ва кІанай бавцІуну

бур. Жула-жуламигума цума чув буссарив къакІулли, чІивисса оьрчІашал бивксса ссу ляхълай бакъар. ОьрчІрумачча-гъанначІан биян бувну буссар. Ци бакІрачІан бучІантІиссарив, циксса ккаккантІиссарив къакІулли. ГъанчувначІагу нюзмар-кІира данссар, гиха гай къачагъталу баян буллай бур тІар шиха лавгми цуяца махъунай гъан къашайссар тІий. Къуннува чІаххуврайсса оьлгу бивххун, гайннаннийва загу дуллай, гъаксса ххуйну шябивкІун бия тІар.

Жу, ххаллилсса цІувцІу чарил кІизивурдайсса къатригу Лаккуй къаритан бувну, аьккиал аьршарайн бивчусса чІумал, гийх шяпрай шаршсса чІаттирдавун бивкІиссияв. Дугъансса хъуру миннал дакъая, цуццул къатІри бия. Яхъанай цукун бивкІиссияв къакІула. ДачІра ххяпрах цуццул къатІрацІа авлахъру марцІ буллай, ялув нурма бивхІуну, ккаккан бивсса аьршарал парча марцІ къабувну аьтІун хІал бакъа цІир-цІир тІисса оьрчІан ккукку булун ихтияр дакъа, жу га оьтгун ччурччусса аьрщи багъ-бахчардайн кІура даен дарду. Аькки-чачаннал аьрщи тІутІайх дичин дуллай на передовик труда хъанан циван аьркинссара? Шин личІлачІиссар, бусила, жан харж дурну дацІан дурсса шийхсса ттул эмаратсса къатри. Га цимийл лахълахъисса сситарар жуйх. Мукъва лухІи гъаттара ппалав буссар ттизин, цикссагу ятту буссар. Автоматрах къабучиссар, чІиллах бучІиссар тІий, гай «бусурман зумуну» вих бичлай бур тІархха къачагътал. Жуйсса язугъ, къия цир? ХІукумат чуври, шиккун биян циван бивтссар. Жул нитти-буттан ккавкмур жунма ккаклай бур, жун ккавкмур жул оьрчІан ккаккан най бур. Жу кІийва бунува ливтІуссания. Ци байссар укунсса оьрмулул?

Аьрасатнал аьрал Косовалий ци зузиссар, цаламур билатрайн ва кыни дурккун дунура. Косовалияр Дагъусттан къагъанссарив Аьрасатнан, жува ца билат бакъарув? Тайва азарва доллару буллуну, шиккун циван къабичайссар? Къазахъ-истаннайсса террористал къатІ бан гъан баннин, цал жула ялун ххявхминналсса барча къахвинссарив. Цуксса ярагъуннил балгусса бухъурчагу къачагътураяр ххув хъун бюхъу бакъассагу бикІайссарив шаллусса сверхдержавалул аьрал. КъатІувив, туну президент аьралинайн «разгильдай».

ХІадур бувссар:  
С. МУСАЕВЛУЛ,  
П. БАРИЕВАЛ,  
Т. ШАРИПОВАЛ,  
З. ШАЛЛАЕВАЛ

«Илчилул» архив ххилтү буллай

## «Хачилаевхъул цала миллатрацалли бусса»

- МахИаммад, жува хІакьину шицаллу талатисса? Жула Дагъусттаннайн турлищал бувкІми цар?

– Кавказуллахъ кьанихсса я бурган буллалисса гужру ххишалагу, чІявугу хьуну бур хІакьину. Кавказ Аьрасатнаца буцан баврихъ кьовусса империалист паччахІлугьру ялунна лирчуну сукку тІий дур хІакьину. Сайки щалва Каспи хьхьирил шельф бувгъусса навтлил кьат дуссар тІар ляркьуну махъсса чІуму. Мичча нанисса бур дяьви буллалиминнал ва бан ччиминнал мархха-ххану. Му мурад бартбигьиншиврул ишлагу буллай бур винма ччимур журалул ххуллурду ва кьядарду, ишла дуллай бур диримур хІалушина, вахабистал бикІу ми, кьачагьтал бикІу ми, дяьвилул ва дяьвили махъсса оьрмуллул кьарчиншидарал кьазразан бувсса чачан бикІу ми. КутІану учин, хІакьину хьинну чІявуссаннан, кавказулла миллатругу баканма, аьркинну бур цуппа Кавказ, - географиялулсса единица хІасаврай. Ми гьарзадрал ялун цинна ци ччиссарив, ссаха зу зиссарив, цурда ци мурадран наниссарив кьакІулсса Аьрасатнал паччахІлугьру дур яла.

- Хьинни, бухьунссар ми гужру, чІалайгу бия бушиву, буслайгу бия заннал кьинилухун ми хІадур хьанай бушиврия. «Хаттабул лагерь» тІисса калималия ца заназі бусала хьуну бия. КІулнугу бунува, туну, цанни, миннал хьхьичІух бару кьабувну бивкІсса? Цанни миннал кІакссара бигьанна, цавагу ккулла пІякь чин кьабувнува, кІирагу район дургъусса?

– Жува хІакьину ялапар хьанахъисса чІун муксса махІатталсса, муксса махІасарасса дурхха, хІатта инсан цалва яруннан чІалачІимургума чІалачІисса бурвав, вичІан баллалимургума баллалисса бурвав тІисса кІанттайн утлай ур. Лагма-ялтту хьанахъисса иширттал жува кувни жуйнма жувагума вихшала дишин битлай бакъару, вих хьун битлай бакъару. КьакІулли ча нанисса дуссарив ми хІикматшивурту, ци кьисасрая нанисса дуссарив. Тигьанну, кІа баргь бугьан хьхьичІ, буссияхха дуняллул ахир хьун наниссар тІий, инсаният лиян наниссар тІий, «парад планет» тІий. Ци кІулли, мичча нанисса дуссарив вай гьарца зат... Бюхъай укусса чІунгу Аллагьнал жуйнна чІумуа чІумуйн ликкан дайсса дикІангу, тикрал шайсса дикІангу... Цукун дулуви на вил суалданун жаваб? Циван бивтсарив, бивтунни кІай буххан. Тти бавкьунни Аьрасатнал аьрал, талай бур, буцири ттуптупханардугу ишла буллай. Ккаккан буллай бур, тІий бур, вайксса кьачагьтал бухлаган барду, вайксса лахъазанурду ласарду, зеххарду тІий. Масала, ласарду тІий ккаккан дурунни

Уссурвал Хачилаевхъал цардацун бавхъусса ихтилатру, тІарду тачІавагу хьхьара хьун тІий бакъар. Хьхьарагу цукун хьунссар, ми цардахъсса цуппа бялава хьинну хьунмасса бухьувкун, му бялалул жула Дагъусттаннал оьрмуллу, политикалувугу бувгъусса кІантту, шин-цукун ччай бухьурчагу, кьачІалачІимишан дурну кьабитан кьашайсса бухьувкун. Жула дагъусттаннал аьршарай дяьвилул питна сукку хьувкунни, ххюлийну ххишала хьунни вайра цардахъсса кьулагъас дуллалаву ва ябитлатаву. ЗахІатсса чІумал лакрангу, цинявпагу дагъусттанлувтурангу чара бакъа кІул хьуну ччай бур шицал буссарив уссурвал Хачилаевхъул, бавну ччай бур миннахъсса мийжаннугусса махъ. Вай гьантрай жу хьунабавкьуру МахІаммад Хачилаевлушал, буларду буккултрангу, жуннагу жавабру бавну ччисса цаппара суаллу.



МахІаммад Хачилаев

«Ттуккул-ВичІив» тІисса яла бюхттулмур лахъазан. Баян бувунни цимилвагу, кІива-шанма гьантлува кьачагьтал хит бантІиссар тІий. Лахъхьу тІурча, ПаччахІлугьрал Советраву хьусса, циняв аьралитал-бакІчиталгу гьуртту хьанахъисса батІаврий ДР-лул Халкьуннал Мажлисрал хьунама МухІу Аьлиевлул хьинну аьратталсса, аьй-бювкьу дуллалисса лугъатрай увкунни, цинявнангу баллай: «Зу циван буру зула зува хьаврин буллай, зуния вари чинсса ттигу цуппа ца позиция кьалавсунни!» - куну. Жула совет заманнай бикІайссия, «Пионертурал зарница» тІисса тІуркІу. Муна му тІуркІулуха лахълай бур кІикку хьанахъимур ттун цалсса.

- Даькьаврих, хьинмуних чувру жува луглан аьркинсса? Ва оьшиврува букканшиврул цуру дуллан аьркинсса?

– ХьхьичІва-хьхьичІ жува, дагъусттанлувттал, аьркинссару ца хьун, ца мяьрипатрай гьалгъа тІун ва ялапар хьанан. Хьуни-хьунисса мурадиртал хьхьичІ жунма аьркинссар мюрш-кьюрши хьамабитан, ми ххалуйхъ кьалахлан. ТачІав кьашайссар Дагъусттаннай, кьабитайссар тІийгу бивкІун, чІалай бурив бигьанма дяьви байбишайсса куц. Жува жула душмантурал хІатта жушала

дур ччянира цинявпагу дагъусттанлувттурал кІулшилугу, машгьурну дур мура ца Дагъусттаннал кьатІувугу, хьунмасса бур му цанихъсса бяла. ЧІявусса бур ва иширавугу зул чІу бавну ччисса, зу дургъусса тарапрая, позицияли махъ бавну ччисса инсантал – лакгу, кьалакгу.

– Ттул уссу Надирдулгу, ттулгу цаппарасса ххуллу-ххуттаву дуняллухъсса ябитаву ца ахир мурадирайн дукІлакІисса даьар, жу каннай ца кьабакълакьисса кІанттурдугу чансса кьашайссар. Амма мунишала архІал хьиннува чІявусса буссар жул пикриду цалийн букІлакІисса кІанттурдугу, ца кьиматрай кьукьлакьисса ххазинарттугу. Ва хІакьинусса иширал, ситуациялул хІакьирава тІурча, лакрал миллатрал цукунсса чул бувгьуну бурив, мукунсса чул бувгьуну буссару жугу. Цамур кІантту, цамур ххуллу цукунчІав бикІан кьабюхъайссар. Жу хьхьичІва-хьхьичІ гьазгу бувсса, лахъгу бувсса жула миллатраллу, мунишала архІал бивзун нанисса бакъа, ссапаргу жул цамур кьабивкІссар тачІав.

Надир бюхъайссар, му мукун бугу-бур, дин-исламрал ва муницун бавхъусса цайми-цаймигу кІанттурдахъцайминнаха кьалавхъхъусса куцуй уруглай икІан, цайми тІалавшиннарду дуллалисса икІан. Амма Надир дяьви бувну Дагъусттаннай тачІав кьаучІантІиссар.

ТІайлассар, ва цІанасса хІукуматрал, хІукуматрал бакъача, хІукуматрайсса цаппара ишккакултрал хІарачатрайну, Надир, Дагъусттангу кьабивтун, архну ацІан багьну ур. Ттун ттуннагу хьун дурунни цимирагу правокация. ХІасил, жу, Хачилаевхъул, так бушиврия цах увкусса цаппара кланнал лидертурал букъавайсса бакъар, жу оькки-ккаккул бан, гьагьан бан. КьакІулли, бюхъай жу чІивисса миллатрал вакилтал буну тІий бигъа бизлай бикІангу. Амма хасну му миллатраясса буну тІийгу жул хьинну хьунмасса пахру буссар, циксса захІатшивуртту ккаклай духьурчагу, жу тачІав бакІру хьхьичІун кьадирчуссар, дигу-кьадичинтІиссар. ЗахІатшиву арамурайини ликкайсса, лирккукун, духІанссагур чувшиву дикІан аьркинсса. Гьунттийссагу дучІайссар кьини - хьинмургу ссаву буссарив шинчІав кьакІулссар, ца Аллагьнан бакъа.

Цал уттигу тикрал буллай ура, лажин лухІи хьунсса зат я Надирдул, яна тачІав кьабубантІиссар – я лакрал хьхьичІ, я дагъусттанлувттурал хьхьичІ.

- МахІаммад, ина ура, Аллагьнайну гьихсса, дингу дуруччайсса адамина, бусурманчу. Жула пухьлунналгу дуруччайсса диркІун дур дин-ислам ххаллилну. Амма «вахабистал», «вахабизм» тІисса зат я ккаккун, я бавну кьабикІайва

чІявуминнан. Цукунни му мазгъаб хІакьину Дагъусттаннай цакуну хІасул хьусса? Цукунсса дур вил мунихъсса уругаву?

– Ттунгу, зунмагу чІалачІисса куцуй, кІа хІакьину сукку хьусса питнагу, махъсса ппуртту-вусса Дагъусттаннайсса паракъат даькьашивугу чІявуминнал дахІлай бур вахабистурацІун. Му дахІлахІаву, ттул пикрилий, нахІакь дансса даьар. Миннал цалва учай, жу валлагъ, вахабистал бакъаруча, жу, марцІсса, «марцІнихъ лирчусса» исламрал чул бувгьумиру куну, жу яла хІакьмиру, тІайламиру тІисса бур миннал гьалгъа. На кьавихра миннай, кьавихра миннал кІунттил бувгьуну нанисса ярагьуннийн. Кьурьандадул цумур аятрайри бусса, ина лавгун та инсан ивчІа тІий? Чабунугу личин бувну цуппалусса ца хха, муницун бахІлай бур цалва бартбигьин ччисса хумархиялу. Цалгу-кІилгу кьавхьунни ттул миннашал цащалаву гьаст багъсса кІантту. Масала, ми бур ттухъ, ина Мубараксса Кьурьандадулу чивчумур биттур циван кьабуллай ура тІий. Чивчуну бур тІар гикку гьазават бува тІий. Я ина Аллагьнал яивуй, тІий ура на ганахъ, му гьазаватралгу дуссар арулцІалла мяьна, миннувагу га яла тарсумур, таккапурмур циванна ина цІалхъанну язи дугълагьисса? Цал гьазават байбиша ина, гава Кьурьандадулу тІийкун, виятува, вила мяьрипатраятту, дакІниваву. Байбиша му хьхьичІва-хьхьичІ вила вивату. Инава ци зисса урав, цукун ялапар хьанахъисса урав – мичча. Тиха-шиха муна-танал бириян бувсса лутгирдугу лавхъхьуну, чІапІа-чІапІа тІий заназавривури шалва гьунар бусса? Ларсун, шариаьтту дирхьуну, бакІру кьукьай заназавривури шалва гьунар бусса, ттархьру ришлай батлатавривури шалла мяьна дусса?

Дуняллий цайми-цайми паччахІлугьру цанничІан ца гьан хьанай, интегировать хьанахъисса заманнай, 21-мурттуршукулий инсаният ялапар хьанан нанисса заманнай, так ца шариаьтрайнусса муххал пардаву хьхьичІух лирчунурув жува шябикІан аьркинсса? ТІий бур ялагу, жунна ислам инсан чІяву-чІявусса бунагьиртаца марцІ аншиврулли аьркинсса тІий: зунаду бацІан бан, литІавуртту дацІан дан, цурк бухлаган бан, наркотикру хьамабитан бан, аьркинссар жуна ислам. Ислам дІар ххачпарас дикІу, буддизм дикІу – динну дуняллийн дурккун хьуну дур азардахъул шинну, амма цавагу бунагь царагу диндалул инсаннаву ттигу-шилагу бухлаган бувну бакъар. БивчІан бувну бакъар.

ХІатта Адам-Идавсума бунагь бувну ивкІун тІийри тІар Алжаннува Аллагьнал уккан увсса. Вайминная ци тІунна ина яла...



«Илчилул» архив ххилтгу буллай

## «Хачилаевхъул цала миллатрацалли бусса»



БувчИайма, бугу-бувчИуну, цу-ухъурчагу, та-ухъурчагу, тИайласса ххуллийх най ур, инсаншиврул, имандалул ххуллийх най ур. БувчИайма тИурча, бувчИин къаччима, тачИавгу тИайласса ххуллийн кИура аян тИий акъар. Ливсса ххуллийх нанисса-найна ур. Мунияту, цинияргу хъхьичИ, жунма аьркинну бур жувурасса кИулиши ххисшала дуллан, аькьлу камил буллан, ва щалларагу дуняллийсса инсаниятрал ххазиналува ххуй-ххуйми, ххалли-ххаллими ттеркьукьив жувунна ласун, къамул дан, мунияту жулва инсантал ва миллат лавайгу, авадаңгу буллан. Жунма аьркинни жулва багъу-бизу, ялапаршин абад дуллан, жулва оьрчИал гьунтгийсса оьрму бигъа банмуних луглан, ляхълан. Акъахъурча жува тачИав захИматшиврува буккан най бакъару. ЗахИматравун къувтИунма бикИайва жулва нину-ппугу. Буттащал гъаравух, мурчавух, марххалттанивух на навагу лавгссара цимилагу яттичИан. Нинугу дикИайва, бакИччаннаа бакИ гъаз къабувну, зузисса-зийнна – чИун дакъана диркИунугу ларгуна, аьпа биву.

Жувува, жулла дакИурдиву чара бакъа Аллагъ икИан аьркинссар, Аллагнайн дирхуннасса имангу дикИан аьркинссар.



Къурьандадуву дуссар укунссагу аят, ттунна дакИнийсса кушуй, оьрусрайра учинна: «Сотрудничай в добре и процветании, не сотрудничай во зле и разрушении». МухИаммад-Идавсил (с.а.с.) Сунналуву бур ххаллилсса хИадисгу. ХъхьичИвахъхьичИ ина гъазаватрай увкун икИан аьркинссара вишала инава, вивурасса порокирттащал, тамахИкаршивурттащал куну бур гикку.

Ва ихтилтрахун ца затгума дакИнийн багъунни цИана. Мюршисса чИумал, Надиргу, нагу

яхъанай бикИайссияв къутандалий. АрхИал лечлай бикИайссияв кИия. Надир ттуяр дурагу кИира шиналли чИивисса. Ганал, чув ци лякьирчагу, ци дириярчагу, гассят ттучИан ларсун учИайссия. Ккашил-за хъувкун, на га шаппату ччатИ-нис ласунгу гъан увайссия. Надирдул га цува лавсун увкИсса ччатИ, кИигу бувхъун, бишайва цала хъатлий, ма ласи куну. На ка тИитиннин, лавсун га цахъи хъунмур касак, ттухъхъун булайва. Ча, чИивинийва, гиччава найунува Надир икИайва сахаватлувсса, чумартсса.

Хасият дикъарчИайссар учайссар, гана гукунсса уссар га уттигу, цахъхъунна диримур чийх дачИлан икИайссия, цува дакъана ивкИун.

ХИакьину инсантурува тамахИкаршивуртту чИару хъуну дур, эгоизм ххисшала хъуну дур, ми яла гиччара гиккун кИура даллай дур оьшиврийн ва оьхИалшиврийн. Муниятур яла дягъвирду, питнарду буллай буклакиссагу. Жува тИисса гъазаватту цалчин муна му оьшиврушал ва оьхИалшиврушал талатисса ярагъну бикИан багълай бур, оьшиву хъиншиврийн дуккан дуллалисса инструментну бикИан багълай бур.

• – **Тти, чиннуча, ца хъун дакъасса лаизаву хИисаврай, ци учин ччива вин жулва лакрахъ, ларкрал жагьилтурахъ?**

– Ца чИумал, дуняллийх цИаларгсса полководец Александр Македонскийхъ, Зулкъарнайхъ цИухлай бивкИун бур, вил ци хиял бур винма бартбивгъуну ччисса тИийча, ганал куссия тIар: «Ттун аьркинну бур дарув-дарман, ттулла цИуцИавринсса бакъача, нара ласласисса ххувшавуртансса», - куну. Жунма лакрангу аьркинну бур ХИакьину дарув жуйнма жува кИура баен бансса, жува заэшиврува личин бувансса. Гъазават баян бан багълай бур жушалва жунма, жулла

биччибакъашиврушал. Жула яла нигъачИаву ххисса душман – му вилаххату уклакима душманни. Къачансса бур жулва миллатрал дяниву национал-хаинтал, ми сававну биллалисса зараллугу хъинну хъунисса бур. ХъхьичИра-хъхьичИ жулла дакИру тархъанну дикИан аьркинссар. Инсан мудан кИункИу тИиссар талихИрачИан, амма талихИ къабучИайссар, дакИниву тархъаншиву дакъахъурча, лагънал хасиятрай ялапар хъанай ухъурча.

Жулва жагьилтуран, чиваркИуннан кИулу бикИан аьркинссар, жула ччаннай жува къанкъану ва тархъанну бацИуну бакъассаксса, жува шинчИав аьркинну бакъашиву, жуйва къуват ххисшалассаксса, жулва дултал ххисшаласса бикИайшиву, чIарав бацИанмигу чан къашайшиву.

Жулва ппухъулуннал жуйнма бувсса аманат ччимур миллатрал наслул дахИалай чинну буюттулсса аманат бур. Му буюттулшиву жуварагу, жулва оьрчИавугу хурда хъун къари-тавуру жуйвасса яла хъунмамур бурж. Цуксса жунна захИматсса, цуксса жапасса чИун дуркИун дурив, мукссара хъуннасса дикИан аьркинссар куннал куннахсса ччаву, ччишиву.

**Ихтилат бувссар  
Руслан БАШАЕВЛУЛ.  
№35 «Илчи», 1999 ш.**

## Цуссалакрал район Бушихъиял щавуй ка дихълай

Аьратталсса чИун дуркИунни Дагъусттаннай, - увкунни Г. Арнаутовал, - депутатътурал корпусрал цащавашаймур бувантИиссар жулла республика чапхунчитурацИа марцИ дуккан дуваншиврул. ХИакьину жулла Ватан диручлачиминнал цIарду кИичИиртган ва школардан дилазисса чИунгу дучИантИиссар.

Хъирив махъ буллауна Цуссалакрал райондалул агъали социал иширттал дузал баврил центрданул директор Лелуева Исанухъун. Вари Цуссалаккуа ка-кумаграцал бувкИссагу. Чачан миллатрал инсанни цуппагу. Мунияту ванил бувсса ихтилат щаллуну чичин пикри хъунни.

–Зу ХИакьину махИрумну личИаврил тахсир, вагъабистурал къакрурал авлия бувну, оьттух хъусса экстремистъурайри, амма зу дакИ зия мадари, ттигур дучИантИисса Бушихъиял талихИсса чИун. Цуссалакрал райондалул агълу дявдилул питна сукку хъусса къинилия шинмай зуй аьтИий бур. Жу жушавашаймур банну ва къурчИисса ХИалатраву зу чIарав бацИан, зун ка-кумаг бан. Цамуния гьалгъа къатIурчагума, зул кИантай жу бикИангу буюхъайвав, жулмур районгу дазуцИухсса дунутИий. Жу ХИакьину чIарусса дуки-хИачИия, янна ларсун къабувкИру, амма жул кумаг ванийну къуртал къахъанахъиссар, жу ттигу бучИанну зучИан. Зуннив цичулийгу чIа тИий буре ччясса

**Жу Сепараторный поселокрайсса Республикалул учебно-производственный комплексрал ХИаятравун буххайхтува, шагьрудул шадсса оьрму цакуну бяливчИунни, аьжаивсса гъапулшиву дагъунни: жул хъунийн бувккунни комплексраву чИумуйнусса мина-гъапулул хъусса Цумадиял райондалиясса лихъачалт, язисса бивкИулий аьтIаврил ятIул-кИири лаган дурсса симаннащалсса хъамигу, ссав ялун дагъсса кунма гъав лавгсса оьрчИругу. Гай пакъирсса инсантал аякъалуван лавгсса комплексрал директорнал, Халкъуннал Мажлисрал депутат Ума Мургузалиевал бувсунни Халкъуннал Мажлисрал сакин бувшиву лихъачалтрацалсса даврилсса булансса комиссия, му комиссиялул хъунмур Галина Арнаутовашал цивпа ХИакьину Цуссалакрал райадминистрациялул цIания ка-кумагранмур ларсун бувкИшиву.**

мутталий зулла тIювардайн зана хъунсса тавпикъ.

Зул оьрчИру цИунилгу ххарину тIуркIу тIуннав, сентябрь зуруйрив зулва-зулва школардал партардах шябикIаваннав.

Хъирив ихтилат бувсса Хайбуллаева Машидатлул, ялукИицI лавгсса интернатирттал оьбединениялул директорнал хъиривмунил бувсуна цалчин цацИанма кумаг бувкИшиву МЧС-рая, яла - Дуняллул халкъуннал ЯтIул Ххачлил комитетрая. Машидатлул дакИнийхтунусса барчаллагъ куна Цуссалакрал райондалия ка-кумаг баврил сиптачи хъусса, Халкъуннал Мажлисрал председателна хъиривма Арсен Каммаевлуин.

Шодрода шяраваллил агъулданул цIания барчаллагърайсса ихтилат бувна Загъидов МахИаммадул.

–На цалчин барчаллагъ учинччай ура буттал шяраваллил жяматрал чулуха Арсен Камма-

евлухъ, иширайну халкъуннал чIарав авцИусса депутатнахъ.

Чачаннал миллатрайн къини дурксса чИумал, жу тайннал дардирдайн ттиликI къадуртессия, - увкуна ганал. – На ттучИана шавай увцуссия 11 инсан, барчаллагъран тIурча, ХИакьину жувагу лихъачалт хъунну. Шикку, гъай-гъай, жун оьккину бакъар, гъарманаха аякъа дур, цуманал ци дуканну, шин ци аьркинни тИий бур. Амма, бусангума нач хъанай ура шагьрулуван уккан кIапИкI жиплува дакъар. «Исламрал боевиктал» тИисса калималулгу ттун гужну къаши хъун дай, ислам – му буюттулсса религияр, мунин цукунчIавсса агрессия къаьамулссар.

Ума Мургузалиевал бувсунни цацIава чIявусса къашайшалт, къари-къужри бушиву. Миннал сияхИ, дурну, Пенсионный фондравун гъан дуршиву, буюхъайсаксса ччяни му сияхИрайн бувну циняв лихъачалтран пенсия,

оьрчИансса пособия булун багъайшиву.

Шодрода шяраваллил агъулданухъ цIуххаву дайху, 7 зуруй пенсиярду ва пособиярду къаласарду тИий бур.

ЧIалай бурув ва суратрай вилттили оьрчИ карунниву бувгъусса хъамитайпа, ва Аьбдулгъазиева Аминатри, шанма оьрчИашал ливхъун бувкИсса. Шанма барз хъусса чИивитИун пеленкардувагу бакъар тИий бия ва . Ккуккулийсса ца цамагу оьрчИ цила шяравушарнилгу ур тIива. Бухъхьича боевиктал, вай вилттили оьрчИашал къадарчИумур дачИин, вайнначИан шилунгу...

Гайннал дакИ хъунмургу бувсун, ссайгъатругу бавчИуну, гичча жу лавгру 17 ПТУ-луван. Гиккугу ур тИий бия 250-270 инсан. Кумаг Цуссалакрал райондалия бусса кИул шайхту, ПТУ-рал директор МахИаммад Камилулул бувсунни цацИанма кИия инсаннал кИи-кИива дарваг качарданул ва иникИмалул биян бувшиву, зу чару, ча бувкИру тИийгу ссияхИ къадуркшиву.

–Цащалва цивпарив лакку мазрай гьалгъа тИий бия, - кунни М. Камилулул, - А. Каммаевлушалу на зий ивкИссара, ганава укун дугърисса тIул дуккаврий хъис махИатталгу къавхъура.

Яла тIурча, депутатътал бивуна Сулакьрайсса «Бургьил полигон» тИисса зоналийн.

Аьмну Цуссалакрал райондалул цала цIания лихъачалтран

30 азарда къурушрансса кумаг бунни, балжисса сияхИ: нувци – 650 кг., ятIул чимус – 450 кг., качар – 10 дарваг, лирцIу нагъ – 30 шуша, хялатру – 120 ва 5 азаруннинсса усру оьрчИан. Ванийн бакъарив иширайнусса, мяълумсса кумаг учайсса?

Мунияту бухъунссия асар хъусса цИумадиял хъами макъ дайгъин къахъанай аьтIутИисса, миннал хъирив, цичIав къабувчИлайнува, мюрши оьрчИругу хИмпIру дуллалисса...

Ца чИиви оьрчИаллив ттучИан гъан хъуну, «Эбелалъул, яц рагъ лъучИизе бугиш?» куну цIувххунни, нагу жавабран чара бакъа дявви чIал къавхъуну къуртал хъунтИиссар учав.

МахИаттал бунна на аьзаврайсса хъаннил ккучундалува бувксса жагьилсса душнил адаварайсса ихтилатралгу. Цаппара чиплагътал сававну чачаннал миллатгу аьзаврай бензин баххан къабитлай бусса бур, гайннаша цичIар машин къаласлай бусса бур. Жува кунма, оьну ливчИун бусса бур. Жуннив я жунма, я чин зарал хъуну къаччива, тIива га душнил.

Ахирданийрив, циняв нара ларссса суратру тIайла дуккан ччива боевиктурачИан, цIуххин ччива гайннахъ къабагъарийну: рязирув, «вирттал», зура дурмуния?

**ЖУЛ КОРР.  
№35 «Илчи», 1999 ш.**

## Жижара


**МАХАММАДУЛ  
АРС АЛИЕВ  
МАХАММАДХИЖИ**

Ормулдул 91 шинаву абпалухъхун лавгунни цала шала орму педагогнал пишалун хас бувсса инсан, цала даврил хъхичунсса специалист, агьлданул ва жяматрал дянив бусравсса чув-адамина, Карашрал шяраватусса Махаммадул арс Алиев Махаммадхижи.

Махаммадхижи увну ур 1933-кусса шинал Карашрал шяраву. Гъумук хъхичунсса кьиматирттай педучилище къуртал


бувну махъ, дахъа балугъравун увхсса орчI, дихълай ивкIун ур дарсру ормулдул сайки цащалва архIалсса учениктурахъ. Дихълай ивкIун ур дарсру личIи-личIисса школардай, личIи-личIисса кIантурдай, личIи-личIисса миллатирттал дянив. Гъарцагу кIанай ванал цагу бусраврай дакъа зумух къаласайва.

Ванал бусравсса биография-луву хъиннува ккалли бансса затну ци хъанай бур учирча, ваняр 30 шинал хъхичI, шагърулийсса дузалсса цалва ормугу къабивтун, Махаммадхижи ивзун ивкIсар буттал шяравун. Игу-ивзун, кIиккусса школагу цIуницIакул уттабуккан бувну, зун ивкIсар цувагу кIикку, цал директорну, яла, пенсиялийн увккун махъ, учительну. Цала ряхагу арсгу лагма лаган увну, буттал шяраву дурссия цIусса къатригу (цалла буттал къатри диркIсса кIанай).

Махаммадул арс Мусилахъал Хижи (жул жяматрал дянив ванайн укунни учайсса) жуятува батIул шаврил пашманшивугу кIидачIлай, жижара буллай буру арсурваврахъ, арсурвавра хъаннихъ, орчIал орчIахъ ва махъсса цинявпагу гъан-маччаминнахъ.

Цал бунагирттал аьпа баннав, рухI паракъатний дишиннав, имандалий лавгун хъуннав.

**Карашрал жямат**


**ХИУСМАННУЛ АРС  
МАХАММАДОВ  
ПАВЕЛ**

Ормулдул 65 шинаву хархавар бакъа жуятува батIул хъунни ЧIайннал жяматрал дянив бусравсса арс, яхI-къириятрал увччусса зунтталчу, Хиусайннул арс Махаммадов Павел.

Павел увну ур 1959-кусса шинал ЧIайннал шяраву, муаьлимтурал – Махаммадов Хиусайннул ва Махаммадова Асиятлул кулпатраву. 1977-ку шинал лавайсса кьиматирттай къуртал бувну бур ЧIайннал шяравусса дянивмур даражалул школа. Муния махъ, армиялул буржгу лавхъун, увххун ур Дагъусттаннал институтрал хIакинтал хIадур байсса подкур-

сирдайн. Институтраву дуклайгу унува зун увххун ур Республикалул онкодиспансерданийн. 1986-ку шинал лавайсса кьиматирттай Медицинститутту къуртал бувну, хирургнал пишалий зун тIайла увккун ур Белгородский областьрайсса Губкинск шагърулул азарханалийн. Шикку Павеллул дурну дур 5 шин. 1991-ку шинал кIура авну Дагъусттаннайн, ва зун ивкIун ур Каспийскаллал шагърулул азарханалийн. Муния махъ зий ивкIун ур Ккуллал райондалул азарханалийгу.

2019-ку шиная шийнай Павел зий уссия МахIачкъала шагърулул 1-мур азарханалийн, цува къашай хъуннин.

Павел ия чIивину унува чIун-архIал орчIаву низам дусса, давриву ва дуккавриву итххавхсса орчI. Ванан хъинну ххирая цала ЧIайннал жяматту, Лакку кIанугу, дусталгу.

Ванал хIалал дурссар чIарусса грамотартту ва бахшишругу. ИчIува Павел ия ххаллисса лас, хIалимсса ппу, гъанминнай дакI цIуцIисса маччау.

Павел аьпалул шаврил пашманшивугу кIидачIлай, дакIнийхтунусса жижара буллай буру кулпатрахъ Аслихъ, арснахъ ЖахIпардухъ, душварахъ Мариямлухъ ва Асиятлухъ, уссурваврахъ ва ссурваврахъ, махъсса гъан-маччаминнахъ. Бунагирттал аьпа баннав, гъав нурданул дуцIиннав, рухI рахIатний дишиннав, махънал ормурду лахъи баннав. Амин!

**ЧIайннал жямат**


**ЩАЙХОВ  
ДАНИЯЛЛУЛ  
АЬПАЛУН**

Агъ, Даниял, ттул куяв,  
Чумартсса дакIнил заллуй,  
Ина къанкъассиявхха,  
Хъхъара цан дав, ххирاما.

Вил къурчIисса бивкIулдул  
Къуру цукун кьютI чиви,  
КъабаянтIиссарив жун  
Вил хъярчлийсса ихтилат.

Зий дакъацIайсса кару,  
Цукун дацIан дав, куяв,  
Чулийн къабувк умудру  
Щийн аманат бав ина.

Ттул ххирасса куявтал,  
Зу икьрал дурссиявкъай,  
Гъидайдихълул гъантрай  
Ва дуниял къаритан.

Апаннинан шанна шин  
Дуван ца гъантта ливчIний  
Даниялгу зевххунни  
Пасатсса азарданул.

Агъ, ххирамий, ххирамий,  
Цу-цуманах аьтIува,  
Язи-язими лаглай,  
МахIрумну ливчIуннухха.

Игъалагу, Даниял,  
Ахиратрал къатраву,  
Вин алжан нясив баннав,  
Гъав нурданул дуцIиннав.

Зул ххаллил арсурвавра  
Зул цIарду ядуваннав,  
Бусраврай ва хIурматрай  
Зу дакIнин бичаваннав.

**Роза Малучиева**

**Зун оьвтIий  
бур**

Аьрасатнал МВД-лул АцIуссалакрал райондалийсса отделданий зун оьвтIий бур 18 шин хъусса, виваллил органнай ялараймур каялувчишиву даймур къуллугърай зун ччисса чиваркIуннайн.

Чара бакъасса тIалавшиннарду: Аьрасатнал Федерациялул ялапарлув ушиву, дянивмур даражалул кIулшиву душиву, армиялий къуллугъ бувсса ушиву ва дуснакьравун къаагъсса ушиву.

Аьркинмур кIул буван бюхъайсар вай телефоннайн оьвкуну: 8(722) 99-65-15; 8-928-978-10-82

**ХI. АЬДИЛОВ**

## Баян

«Илчилий» бишлашисса жижарттал текстру буссар  
«Укунсса багърал лагрулий:  
укунмасса жижара – 400 къ.  
суратрашалсса некролог – 500 къ.»

## Объявление

Утерянный аттестат 00518001359760 о среднем образовании, выданный МКОУ «Новокулинская СОШ №2» имени Аметхана Султана в 2021 году на имя **Рамазанова Мурада Патрисовича**, считать недействительным.

УнциукIуллал райондалийсса Ахульго зунттуу хъунни 12 азарунни ливчусса инсантал бавтIсса, «Ахульго - вершина знаний» тIисса Республикалул мажлис.

**Республикалул мажлис  
хъунни Ахульго зунттуу**

Ванил сиптачитал бия Дагъусттаннал гуманитар институт ва УнциукIуллал райондалул администрация. Динчи-аьлимчув Идрис Асадуллаевлул чIурчIав дуруна жагьилтурал дянив наркомания ппив хъанай душиврий, чара бакъа орчIругу, жагьилталгу ва балаллуя буруччинсса чаран лякъин багълай бушиврий. Республикалул Муфтиятрал просвещениялул отделданул зузала МухIаммадрасул Гимбатовлул кIицI лавгуна, диндалул кIулшивуртту куртIсса, цIакъсса духъурча, жагьилтал бйакъу ххуллийн къабагъантIишиву. Муфтинал хъиривчу Аьбдулла Салимовлул бувсуна махъ ппурттуву республикалий хъусса иширттая, Муфтиятрал даврий аьй-бювкъурду дуллалисса кIану бушиврия, даву дащуй дишинми мударану бикIайшиврия, амма куннащал кув бавкъуну, цалийн къабувкIсса кIану бухъурчагу, дакIру ца дурну, махъгу ца бувну къушчу тIун аьркиншиву. Республикалий мударану, динну ва миллатру личIи къабуллай, хъунинминнал хIурмат буну, Муфтиятрал дуллалимунивух гьурттуну, исламрал ххуллу-хха бурувчуну



занакулу хъанай бивкIшиврий, уттигу мува ххуллийх бачиншиврий чIурчIав дуллалисса ихтилатру бувна ДГИ-рал ректор НухIкъади БахIмудкъадиевлул, УнциукIуллал райондалул хъунама Ися НурмахIаммадовлул ва махъ нанисса цаймигу аьлимтурал.

Мажлис къуртал хъуна умралийнсса путевкарттал кIуну буккаврийну, 3 инсан мубараксса аьршарайн хIаж бувансса путевкарттал заллукъру хъуна.

**Патимат РАМАЗАНОВА**

**Дагъусттаннал  
ЦУР-данийн чирчуну  
дур 2636 лабизаву**

ЦУР-данул зузалтрал ларгмур нюжмардий сияхIрайн ларсун дур 2636 лабизаву. Миннува чIаруми чирчуну дур МахIачкъалаллал ялапарлувтурал – 1760, Каспийскалия дуркIун дур 489, Дарбантлия – 184, Буйнакская – 40, Хасавюртлия – 26, миннува чIаруми лабизавуртту дур ЖКХ-лул

масъаларттал хIакъиравусса – 1236, цIинцIал бакIурдал – 284, ххуллурдал – 284, дузалшиндарал – 269, жяматийсса транспортрал хIакъиравусса – 71.

Циняв лабизавуртту тIайла дурккун дур жаваблусса органнай, бартдигиншивул.

**Дагъусттаннал  
каратистътурал  
дурххунни медальлу**

Мукъра медаль дурххунни Дагъусттаннал каратистътурал Сочилий хъусса Дунияллул халкъуннал дянивсса «Рашен Опен» турнирданий. Ванил хIакъираву бувсунни республикалул Спортрал министерствалул прессалул къуллугърал. Бяст-ччаллавух гьуртту хъуну ур сайки 500 спортсмен Аьрасатнал регионнаясса ва гъансса дазул къатIаллил билаятирттаясса.

Турнирданий ххув хъуну ур Шамил Богатов (68 кило), 2-ми кIантурду бувгъуну бур Викторя ХIажиевал (68 кило) ва ХIажи ХIажиевлул (75 кило).

Чарвитул медаль дурххуну дур Илияс ХIажиевлул (63 кило).

Медальлу ларсминнал тренерталну бур Оьмар Муртуз-аьлиев ва Мурад ХIажиев.

### Лакрал халкъуннал учаларттава

Лелуххун – инт, оьрчІан – нину.

Лелуххи – хьаттирдацун, щарссагу ласнацун ларай-ссар.

Нину оьрчІахлу цІаравун ххяххайссар.

Нину ккарккун, душ буца, урци ккарккун, къяс биша.

Нину ккарккун, душ буца, ккаццка ккавккун, ттяй ласи.

Ниттил накІлил бувччусса оьрчІ сагъсса бикІайссар.

Ниттил хьирив аьтІи оьрчІ ахьулсаннул хьяврин бай.

Нитти-буттал тІимур бувчІин ччарчан, вила оьрчІ хьунма бува.

Ниттил бивцу цяпа цІун къабикІайссар.

Ниттил бакІравун бав-къумур буттаца буккан бан къащайссар.

Ниттияр тІайласса дус дуллу дунияллий акъассар.

Ниттил цІа дур душ къачча, цІа дурк буттукъа къачча.

Ниттин бивз сси интту марххалар: чІявусса барчангу, ччяни бассайссар.

ОьрчІ щар дуциннин – цала ниттил, дуруну махъ – щарнил ниттил.

ОьрчІ къаьтІурчан, ниттил ккукку къабулайссар.

ОьрчІал ххуллий ниттил хьхьиригумали лахъайссар, тІар.

Ппу акъама – ачІи ятин, нину дакъама – щала ятин.

Ппу арснаха, нину дуинихари тІар зузисса.



## «Илчи» – маслихатчи КІиришивруцІунсса маслихатру




ссихІириайн (пар) дуккан къаритлатисса янналуву ухьурча, ягу гьава кІириний чурххайн гуж багъан буллалисса даву дуллау ухьурча, баргъ лачІаврил нигъачІаву хьиннура хьунна хьанахьиссар.

Баргъ лачІаврил цалчинсса лишаннуну хьанахьиссар бакІ цІуцІаву, гьанагъаву, дакІ ларай нанаву, ссихІ биал къахъанай, яруннил хьхьичІух цІан дагълагъаву. ХІатта хІалдания лагавугума.

\*\*\*

Баргъ къалачІунва кІиришиву бигъану духІан, кІирисса чІумал чурххайн ларххун хьинссар чаннасса янна. ЦІанминнул баргъ, гьилишиву цивунна кІункІу дуллалиссар. Шайссаксса чІярусса шин хІачІлан аьркинссар. Аьгъусса дукрардая махъаллил хьун аьркинссар. КІирисса чІумал чурххайн гуж багълагъисса захІматсса даву къадуллау хьинссар.

**ХІадур бувссар Бадрижамал АЬЛИЕВАЛ**



«ИЛЧИЛУЛ» ТЕЛЕГРАМ КАНАЛ ККАЛАККИЯРА!!!

● ЦІуххинмургу, бусанмургу бухьурчан – баян бува. ([https://t.me/ilchi\\_info\\_bot](https://t.me/ilchi_info_bot))

● «Илчилул» телеграмканалданул буккултрал къюкълувун ина уххарчан, вингу мюнпатссар, жунгу хайрданун хьунтиссар. ([https://t.me/ilchi\\_info](https://t.me/ilchi_info))

@ilchi\_info

\*\*\*  
КъатІув кІиришиву дусса чІумал морозильникраву микІирал диялсса луртан дикІан аьркинссар. МикІ бу-чІину льякьинтІиссар къатта дюхлуду буван. Вентилятордания нанисса дюхлуду кІилий-шамлий ххи дуван микІирал кумаг бувантІиссар. Вентиляторданул хьхьичІ, вания нанисса дюхлуду щилансса кІанттай дишин аьркинссар микІларчІисса щинащалсса шушри.

\*\*\*  
КІирисса гьинтнил гьантрай кондиционер дакъанияр дуну хьинсса зат дур. Амма хьамамабитари дюхлуду шаврицІун вания зарал биян бюхъайшивугу. Кондиционер лархъсса къатлувусса температуралул ва къатІувусса гьавалул температуралул дянив 10 градусаряар ххишаласса тапаватшиву дикІан къаьркинссар. Хьинну бявкъусса къатлува кІирисса къатІув уккаврия, температуралул режим цакуну ва диялну даххана шаврия организмалун зарал буссар.


Ва ялагу, дакІний битира кондиционер, филтрдугу даххана дурну, чІун-чІумуй марцІ даван аьркиншиву, шиву салкъи хьанахьисса лах, ххит щалва къатлувух ппив хъанай, вайнугу цІуллу-сагъшиврун зарал биян бюхъайшиву.

\*\*\*  
Кондиционерданушал мугъаятну бикІан аьркинссар хаснува бурчул азарду дусса, гьавалул температура ва цамур ччяни асар шайсса бурчу буминнан. Кондиционерданувусса ххит, лах асар хьуну, бурчуй ттангъри дуккан бюхъайссар, бурчу, къавкъун, бизлан бюхъайссар.


\*\*\*  
Багъу-бизулуву ишла дувайсса техникалул чанну-ххину кІири буллалиссар гьава. Мунияту, янна шюшай машина, тІахІни-кІичІу шюшай машина, плита бюхъавай хьхьурай чІалну ва кІюрххил ччяни ишла дурну хьинссар. КІирисса чІумал шайссаксса чанну ишла дувара токрайсса чайник, кофеварка, мультиварка. ХІатта лавхъсса телевизорданулгума гьава гьили буллалиссар.

\*\*\*  
КІирисса чІумал инсаннанса яла хьуннамур нигъачІаву баргъ лачІаврияр (тепловой удар). Баргъ лачІун бюхъайссар организмалун хьюмушиву, хьатру диял къахъанахьисса, ванилла хьирив, «терморегуляциялул сбой» хьусса чІумал. Агана инсан хьунмасса хІаллай бургьилу ухьурча, ягу кІиришиву нанисса аппаратрачІа зий ухьурча, гьухъ гьаваллавун дуккан,

### МАХІАЧКЪАЛА



### Гьавалул тагъар



### ГЪУМУЧИ



Газета «Илчи» (Вестник)

Учредитель: Агентство информации и печати Республики Дагестан  
Издатель: ГБУ РД «Этномедиахолдинг «Дагестан»

Хьунама редактор: Къардашов Р. Аь.

Хьунама редакторнал хьиривма: Башаев Р.М.

Жаваб дулайсса секретарь: Исмяилова С.Р.

Редколлегия: Адамов АьбдурахІман МахІаммадович Аьбдуллаев Сапарбаг Аьлиевич Аьлиев ХІажи Сулайманович Исрапилов Артур Анварович КъурбанмахІаммадов Чанкура Рамазанович Маммаев Сулайман Нураттинович МахІаммадов Юсуп ХІамидович Хапалаев Аслан Юсупович Хасаева Гульшан Рамазановна ХІажимирзаев Зиябуттин Абусупиянович Шалласуев Шалласу Рамазанович Эльдарова Роза ХІажиевна

Отделлал редакторгал: Аьбдуллаева А. П. Аьдилов ХІ. А. Рамазанова П. ХІ. Тахакъаева З. К.

Корреспондентьгал: АьбдурахІманова З. Т. Аьлиева Б. Д. Саидова И. А.

Корректор: АхІмадова А.И.

Кказитрал компьютерданул цех: Абакарова К. Н. ХІажиева З. У.

Кказитрай дурксса макъаларттава кІицІ лавгмур тІайлашиврул жаваб дулайссар чивчуманал. Редакция макъалалул залуннал пикрилий рязину бакъахьурчагу, макъала рищайссар, жьматрал цаламур пикри бусанссар тІисса ниятрай. Кказитрайн дуркІсса макъаларттайн рецензия къачичайссар ва ми залуннахьхьун зана къадайссар.

Кказит буккайссар ножмардий цал. Шинай итабакъайссар 52 номер.

Кказитрал индекс. П7046 Тираж – 2000 экз.

Адрес редакции и издателя: 367018, г. Махачкала, пр-т Насрутдинова, 1а e-mail: [ilchi@etnomediadag.ru](mailto:ilchi@etnomediadag.ru) <http://ilchi.info> Тел./факс. 66-00-59

Газета «Илчи» зарегистрирована Управлением Федеральной службы по надзору в сфере связи, информационных технологий и массовых коммуникаций по РД. Рег. ПИ № ТУ 05-00424 от 30.04.2019

Газета «Илчи» отпечатана в типографии ООО «Издательство «Лотос». 367018, РД г. Махачкала, Пр-т Насрутдинова, 1а Срок подписания в печать 19.00. Подписано 19.00.

Цена свободная



4 651116 280051